

حوار من

العالم الآخر

(دردشة مع الأموات .. من الفنانين والفنانات)

بقلم

ياسر قطامش



مكتبة خزانة الورد

بطاقة فهرسة

حقوق الطبع محفوظة للمؤلف

مكتبة جزيرة الورد

اسم الكتاب : حوار من العالم الآخر

المؤلف : ياسر قطامش

رقم الايداع / ٢٠١٦/١٥٨٢٥

الطبعة الأولى ٢٠١٦



مكتبة جزيرة الورد

القاهرة : ميلاد حليم خلف بشار فيصل

ش ٢٦ يوليو من ميلاد الأوبرا : ٠١٠٠٠٤١٦ - ٢٢٨٧٧٥٧٤

الإهداء



إلى كل إنسان ...

يشعرُ بالغربة في هذا الزمان...

إلى أصدقائي الموتى ...

الذين لم يدركوا عصرَ النيولوك ...

ويوتيوب وتويتر والفيس بوك ...

أهدى كتابي هذا ...

عساهم يجدون فيه استلذاذا ...

ومن الهموم ملاذا .

العائش على الهامش

ياسر قطامش

مقدمة

اللهم اجعل كلامي خفيفاً عليكم !!

منذ صباى البعيد بل منذ نعومة أظافرى أى منذ طفولتى .. وأنا
مولعٌ أشد الولع بالماضى المجهول !!!
ومولع أيضاً بكل ما هو غامض ومثير .. لهذا كانت ومازالت
تتنازعنى رغبتان :

الأولى هى عشقى للأفلام القديمة فى زمن (الأبيض والأسود)
فكنت أشاهد أفلام نجيب الريحانى ومحمد عبد الوهاب وأنور
وجدى وإسماعيل يس وغيرهم .. أشاهدها مشي وثلاث ورباع
حتى كدت أحفظها عن ظهر قلب .. ولا أمل حتى الآن من
مشاهدتها .. كنت ومازلت أغوص مع هذه الأفلام فى أيام زمان
وانشوارع زمان ومواصلات زمان وملابس زمان .

أتخيلُ نفسى وأنا أعيش بين من أحببتهم فأتناول الغداء مع ليلي
مراد عند (الحاتى) بشارع الملك فاروق وأعزم ميمى شكيب على
فيلم (غزل البنات) بسينما ستوديو مصر وأتسكع مع الشقراء الفاتنة
كاميليا فى شارع فؤاد ثم نذهب لتناول الجلاس فى (جروبى)
بميدان طلعت حرب وأحتسى القهوة مع نجوى سالم فى

(الأمريكين) على ناصية شارع سليمان باشا !!

أما الرغبة الثانية فهي عشقى لكل ما هو غامض ومثير فى العالم الآخر (عالم الموتى) وعالم الأرواح .. لذا قرأت بنهم شديد كتب (أرواح وأشباح) و (الذين هبطوا من السماء) و (الذين عادوا إلى السماء) لأنيس منصور .. ثم بدأت رحلتى مع د. على عبد الجليل راضى صاحب المؤلفات العديدة عن الموتى وتحضير الأرواح وكذلك أحمد فهمى أبو الخير صاحب مجلة (عالم الروح) فى الخمسينيات .

وكثيراً ما كان خيالى الخصب يأخذنى إلى هذه العوالم المجهولة لأحيا مع الموتى الذين أحببتهم حيناً .. وأحيا مع الماضى الذى أشتاق إليه حيناً آخر .. أتخيل دائماً .. بل يداهننى إحساس عاتٍ بأنى غريب ولهذا أطلقت على نفسى (العائش على الهامش) .. لماذا ؟؟ !! ضع عشرات من علامات الاستفهام والتعجب قبل أن أجيبك وأفصح عن السر الذى أخفيه فى خزانة قلبى وهو شعورى بأنى أتيت لهذا الزمن بطريق الخطأ وقديماً قلت فى إحدى قصائدى:

زمانى ليس هذا فاستفيقى أنا رجلٌ من الزمن السحيق
وأصحابى من الموتى جميعاً وأحلامى من النوع العتيق
فلا يخدعك مظهرى الموشى بأصداف من الغزل الرقيق

أجل أتيت لهذا الزمن بطريق الخطأ لأن زمنى كان فى العشرينيات والثلاثينيات وحتى الستينيات من القرن الماضى ..

زمن الذوق والأدب والإتيكيت زمن الكتاتيب والطربوش
واليشمك وسوارس .. زمن الأماقة والرشاقة والوجاهة والفخامة
والهدوء والفضيلة والعادات والتقاليد الجميلة .

يعنى المفترض أن أكون من مواليد القاهرة سنة (١٩٠٠) وليس
(١٩٦٠) كما هو مدون بشهادة ميلادى .. فهذه هى الفترة التى كنت
أتمنى أن أحيها .. وهذه هى القاهرة التى كنت أتمنى أن أعيش بها
.. فأحمد شوقى وحافظ إبراهيم وسعد زغلول والعقاد وطه حسين
وانمازنى وروز اليوسف ومى زيادة هم أصدقائى وصديقاتى
وليسوا أجدادى وجداتى ..

عندما أرانى عائشاً فى هذا الزمن الذى جئته بطريق الخطأ أتمثل
بقول الشاعر القديم :

ذهبَ الذين يُعاش في أكنافهم .. وبقي الذين حياتهم لا تنفعُ !!
لماذا كل هذا؟؟ لأن الماضى كان جميلاً؟؟ ربما .. فلممنوع
مرغوب دائماً والمجهول يثير اللذة والفضول والخيال .. وهذه
أشياء يحبها الشعراء وأنا منهم .



لهذا كانت سعادتى كبيرة حينم دعانى صديقى أحمد السعيد
المشرف على ملحق (النهارده أجازده) بأخبار اليوم لكتابة (حوار من
العالم الآخر) كان ذلك فى أحد أيام شتاء فبراير سنة ٢٠١٣ وبمجرد

حوار من العالم الآخر

دعوتى لذلك ارتديت ملابس رواد الفضاء وانطلقت بسفينة (أبوللو) وطرت نحو السماء لأخترق مجال الجاذبية الأرضية وأطوى الزمن وأقابل من أحببتهم وأتجاوز معهم .

فيالها من رحلة رائعة .. ولكن للأسف (يا فرحة ماتمت) .. لقد عدت من رحلتى (بخفى حنين) كما يقولون .. لماذا؟؟ لأننى لم أجد من رحى أبحث عنهم فى السماء وإنما وجدت أرواحهم هائمة وتعذر الحديث مع هذه الأرواح (المشفرة) لأنها لا تتكلم بلغتنا التى نتكلمها فى الدنيا .. ما الحل إذن ؟ استعنت بالموبايل ولكنه موبايل بمواصفات خاصة اخترعته بنفسى ويمكن عن طريقه التحدث مع من رحلوا للعالم الآخر .. وأجريت سلسلة من الحوارات الطريفة معهم بداية من حضرة صاحب العزة سليمان بك نجيب ومروراً بالخواجه ييجو وأبو لمعة وانتهاء بـ يوسف بك وهبى وميمى شكيب ..

كان لابد أثناء محاوراتى مع هؤلاء ان أجعلهم يتعاشون معنا ومع ما مرت به مصر من أحداث فى هذه الفترة التى كانت حافلة بمادة دسمة عن المخلوع والهانم وبورتو طرة (سجن طرة) والمليارات المنهوبة ود. مرسى رئيس الجمهورية ود. هشام قنديل رئيس الوزراء .. كنا نعيش مرحلة غريبة تشبه انعدام الوزن وغيوبة المخاض إيذانا بميلاد جديد استمرت هذه المرحلة عدة شهور وكانت حافلة بمظاهرات كل يوم جمعة فى ميدان التحرير ورابعة وشعارات كثيرة عن العيش والحرية والعدالة الاجتماعية ومشروع

حوار من العالم الآخر

النهضة وشرشة من بعض المذيعين والمذيعات على شاشات الفضائيات من عينة من قال عنهم الشاعر القديم :

لو كل كلبٍ عوى ألقمتهُ حجرًا لأصبح الصخرُ مثقالاً بدينارٍ

وكان الحرية التي لم نألفها بدلاً من أن تمنحنا الأدب والاحترام والنظام منحنا قلة الأدب والفوضى وعدم الالتزام عشت هذه المرحلة بحلوها ومرها وكانت حكومة د. هشام قنديل نحاول إرضاء جميع الأطراف وتتبع سياسة (أطبطب وأدلع) وترضخ لكل إضراب أو اعتصام وترجع في كلامها .. وهو خطأ فادح أضربنا كثيراً.



عشت هذه المرحلة التي انفجرت فيها ماسورة الحرية فأغرقتنا في الفوضى والانفلات والبلطجة وقطع الطرق والمطالب الفئوية والائتلافات .. ظهرت مصطلحات كثيرة وقتها منها : (الفلول) ، (اللهو الخفى) ، (الناشط السياسى) ، (مظاهرة مليونية) و ... إلخ إلخ .

كان لابد وأنا أتجاوز مع أصدقائي من العالم الآخر الذين تراهم في هذا الكتاب أن أستحضر أعمالهم الشهيرة و (الإفبهات) التي عُرفوا بها مع إشراكهم في ما كنا نعايشه من أحداث مثل : هروب بطرس غالى وحسين سالم وظهور د. مصطفى البرادعى واختفائه وانهار البورصة ومفاوضات سد النهضة بأثيوبيا وفتح الأنفاق

حوار من العالم الآخر

والتهريب والعجز في الميزانية والمطالبة بدم الشهداء وأزمات السولار والماء والكهرباء و طوابير العيش والبنزين وأنابيب البوتاجاز واحتلال الأرصفة والشوارع والميادين بالآلاف من الباعة الجائلين والبلطجية الذين لو اطلعت عليهم لوليت منهم فراراً ولملئت منهم رعباً .

لاشك أن الكثيرين من أحبابي الموتى الذين تجدهم في هذا الكتاب اعترضوا على الحديث معهم في هذه الأمور وخافوا وكادوا يهربون من (المولوتوف والشماريخ والقنابل المسيلة للدموع) .. ولكنهم اطمأنوا عندما حلفت لهم برأس أبي وجدى أنى من (حزب الكنية) ولا أتبع لأى أحزاب أو جماعات أو ائتلافات من نوعية : (تمرد) و (إنقاذ) و (٦ أبريل) و (الأتراس) و (البلاك بلوك) .

وافقوا لكن بشرط أن أمنحهم (صكوك وكوبونات) الرحمة والمغفرة .. وافقت وتجاوزتُ معهم متظاهراً بالشجاعة وأخفيت عنهم خوفاً على نفسى وأهل بيتى من (الخطف والمطالبة بفدية) .. ولكن الحمد لله ربنا ستر ومرت الأيام ومازلنا على قيد الحياة حتى يقضى الله أمراً كان مفعولاً .

كان لابد من هذا التوضيح لأن الأحداث والملابسات التى شهدتها مصر خلال فترة كتابتى لحواراتى مع هذه الشخصيات ونشرها بأخبار اليوم كانت حافلة بالمتناقضات والمصطلحات والأمور الغريبة ولكنى آثرت عدم تعديل ما أثبتته فى محضر

حوار من العالم الآخر

الحوارات ولم أغير أقوالى ولم أسمح للرقابة بالتدخل أو الحذف لأى فقرة كتبتها والله على ما أقول شهيد .

لقد أردت بذلك أن تتعايش الأجيال القادمة مع ما تعايشنا معه .. لأن هذه الحوارات تأريخ لمرحلة هامة من تاريخ مصر .. من عاشها يتذكر عندما يقرأها ما عشه من أحداث .. ومن لم يعشها تجعله كأنه عاشها .

ولا أجد ما أختتم به حديثى هذا حيرا من قوله تعالى :

﴿ إِنَّ اللَّهَ لَا يُغَيِّرُ مَا بِقَوْمٍ حَتَّى يُغَيِّرُوا مَا بِأَنْفُسِهِمْ ﴾

ولن يكون ذلك إلا بصدق النيات وإيثار الغير على الذات وأن يتم (التواصل الاجتماعى) بين جميع الفئات .. عن طريق الحب ونشر الخيرات بدلاً من الفيس بوك وتويتر والشات .. واللهم اجعل كلامى خفيفاً على القراء والقارئات .. الأحياء منهم والأموات .

تحرير أفى : ١٤ أكتوبر ٢٠١٤م

٢٠ من ذى الحجة ١٤٣٥هـ

ياسر صلاح قطامش

المعادى الجديدة

حضرة صاحب العزة

سليمان بك نجيب

جنتلمان السينما المصرية



1892-1955

أشهر أعماله :

- غزل البنات
- الأنسة ماما
- فاطمة
- الأنسة حنفى

أشهر إفيهاته :

- كويس قوى خالص
- ضليع فى قواعد اللغة العربية
- يا زلنطحى يا جربوع
- ما انفك وأخوات كان
- خلقتة المشلفطة الملخبطة وهدومه المزروطة الممرمطة



آلو... مين معايا؟



- آلو .. صباح الفل يا سليمان بيه .
- (كويس قوى خالص) بتصحيني من أحلاها موته علشان تقوللى صباح الفل طيب يا سيدى صباح القرف .
- مش عيب عليك يا سليمان بيه تنام فى أحلاها موته وسايب البلد تغلى بالاعتصامات والإضرابات والمطالب الفئوية؟؟
- (كويس قوى خالص) و (الآنسة ماما) موقفها إيه ؟
- (الآنسة ماما)؟! قصدك مين ؟
- قصدى (الحكومة) حكومة د. هشام قنديل الى عماله تتطببط وتدلع على طريقة البنت العكرونة نانسى عجرم .
- ما هى بتطببط وتدلع والدنيا بتولع وقربت تفرقع
- أنتم محتاجين واحد (ضليع فى قواعد اللغة العربية) قصدى قواعد اللعبة السياسية واحد مرعب فتوة مخيف زى زكى رستم أو

فريد شوقى أو محمود المليجى .

▪ يعنى ما ينفعش واحد ضليع فى قواعد الخس والجزر
والجرجير زيك فى فيلم (غزل البنات) ؟

- بتقول إيه (يا زلنطحى يا جربوع) مش كفايه إنى اتبهذلت
امبارح لما نزلت من بيتى فى شارع لقصر العينى واتجهت إلى شارع
الصحافة لزيارة أصدقائى محمد التابعى ومصطفى أمين وكامل
الشناوى ولقيت ميدان التحرير وشارع فؤاد مليونين باعة متجولين
وحمير ومتسولين وتكاتك وناس تايهين ماشيين ومش داريين..
فوضى وتسيب ولا مبالاه فىن البوليس المصرى ؟ وفين الكلب
هول ؟

▪ طيب ورأيك إيه يا سليمان بيه يا صاحب العزة فيما يحدث ؟
- عاوز رأى (على عينى حاضر) أنا رأى يا مونشير إن فيه أزمة
أخلاق وتربية وفيه ناس (كثير قوى خالص) أساءوا استخدام
الحرية بعد ثورة يناير .

▪ والحل إيه ؟ قل لى عليه ؟

- التاريخ يعيد نفسه فإفكر إضرابات عمال الترام فى ثورة ١٩١٩
ومظاهرات الطلبة سنة ١٩٣٦ وحريق القاهرة سنة ١٩٥٢ ؟

▪ لا مش فإفكر أصلى كنت نسه فى (k.g.1) .

- كان فيه منتهى الحزم والضرب بيد من حديد يعنى اضرب السايب يخاف المربوط لازم كده يا إما البلد هاتضيع .

▪ بس زمان كان فيه كبت وظلم وتعسف وماكنشى فيه فضائيات وفيس بوك ونشطاء سياسيين يهيجوا العالم والرأى العام .

- (كويس قوى خالص) يعنى نسيب الرعاع والغوغاء والبلطجية والأونطجية يخربوا ونقف نتفرج ؟ فين (أخوات كان) فين ما انفك وما انخلع وما انضرب؟

▪ ما هو من ساعة ما انخلع (المخلوع) وبعدها انقلب الموضوع وبقيت اشوف الصايح والجربوع باسم الثورة ماشيين فى الممنوع بأخلاقهم (الممرمطه) (المزروطة) لحد ما الناس حياتهم بقت (ملخبطة ومشلفطة) .

- طيب وحياء رأس أبويا مصطفى بك نجيب (صديق الزعيم مصطفى باشا كامل) وكمان وحياء رأس خالى أحمد زيور باشا رئيس الوزراء وكمان وحياء راس ابن عمى الشاعر أحمد زكى أبو شادى مؤسس مدرسة أبوللو وحياء رأس (فاطمة) و (الآنسة حنفى) كمان لو ما انعدلش حالكم لأكلم د. مرسى وأخليه يحكمكم بطريقة يوسف بك وهبى فى روايته (حكم قراقوش) ويطلع عينيكم .. مع السلامه اقفل السكه قبل ما أقفلها أنا فى وشك .

زعيم مملكة الفشر
أبو لمعة الأصلي

الفشار البريمو ونجم برنامج ساعة لقلبك



1924-2003

أشهر أعماله :

- برنامج ساعة لقلبك مع الخواجه بيجو ود. شديد وفهلاو
- خليك بحبوح
- شيلنى وأشيلك

أشهر إفيهاته :

- الجلاية الدبلان المخططة بتاعت أخويا شلبى
- شوف يا خواجه
- قلت لى إزاي ؟
- واخد لى بالك يا خواجه
- حاجة غريبة
- وحياة راس والدك
- الكذب خيبه



آلو... مين معايا؟



- إزيك يا أستاذ أبو لمعة وازى ابنك لمعة ؟
- لمعه إيه يا خواجه ما خلاص (الواد لمعه) انظفا ومش لاقى ورنيش ألمعه وكل ما اجيب ورنيش ألاقه صيني مضروب!!.
- طيب وأخبار (الفسر) إيه ؟
- فسر إيه (يا خواجه) ده أكبر فشار ماكنشى يخطر على باله مهما فسر الى بيحصل دلوقت (قال إيه) قطع طرق واعتصامات ومولوتوف وبلاوى زرقه.
- طيب ورأيك إيه ؟ نتصرف ازاي ؟ ونعمل إيه ؟
- (شوف يا خواجه بيجو) قصدي يا ابن قطامش أنا لو مكانكم ألبس (الجلابيه الدبلان المخططة بتاعت أخويا شلبي) وانزل ميدان التحرير ومعايا صابون ومولوتوف وقنابل مسيلة للرغاوى وهاتك

يا زحلقة وكل واحد أونطجى أو بلطجى عامل ثاير وبيهتف أزحلقة
وبعدين أشيله بالجاروف وارميه فى الزبالة.

▪ طيب ولو اتترفز بعد الزحلقة وقام يضربك بسنجه أو طبنجة
أو آلى ؟

- ولا يهمنى .. أجرى منه هايجرى ورايا لغاية إيه ؟ (قول إيه)
لغاية ما اوصل لأسد كوبرى قصر النيل واستخبى وراه واللى يهوب
ناحيتى أسيب عليه الأسد ياكله (همّ يا جمل) .. أصل الأسد ده
تربيتى من أيام ما كان شبل بيرضع لبن نيدو.

▪ طيب والحكومة بتاعتنا رأيك فيها إيه ؟

- الحكومة دى ولا مؤاخذه زى ما قالت (أم لمعه) حكومة
طريه قوى زى الخس والفجل الوراور ولما أم لمعه جت تعمل لى
من حكومتكم طبق سلطة قلبت لى معدتى على الأرض .

▪ وما عندكش علاج يا أبو لمعه ؟

- عندى و (حياة راس والدك) وصفه ما تخيشنى (قلت لى
أزاي ؟) هات ٥ كيلو فشر بلدى وحت عليهم ١٢٠ جرام شطة
فضائية مشطشطة وشوية عك على تصريحات من اللى بنسمعها على
شوية قرف من اللى عاملين نفسهم ثايرين وناشطين (واخد لى بالك
يا خواجه) .. وحت على الوش كريم شانتية من اللى قلبك يحبه بتاع
هشام قنديل وبالهنا والشفّا تطلع دليفرى على ترب الغفير .

■ يعنى إيه ؟ مش فاهم !!

- (حاجه غريبه) مش عارف يعنى إيه ؟ يعنى كل واحد بلطجى وعامل ثاير ياخذ له وجه تيك أوى وبعدها مش هيلاقى بطنه ومصرانه الأعور هايبقى أعمى ومش هایشوف غير الإسهال مع مغص يجيب أجله .

■ طيب مش عاوز تشكّل وزارة جديدة ؟

- يا سلام ده عندى تشكيله ماتقولشى لبتوع الإنقاذ عليها ..
خد عندك (أم لمعة) وزيرة كوبونات البنزين والعيش والبوبوتاجاز و(أخويا شلبى) وزير البكش والأونطة و (د. شديد) اللى بينسى وزير التصريحات المضروبة و (فهلأو) وزير الإضرابات والمظاهرات و(الخواجه بيجو) وزير الضحك على الدقون و

■ حيلك حيلك كفايه يا عم أبو لمعه أنت عاوز البلد تروح فى داهيه ؟

- داهيه ليه يا محترم (خليك بحبوح) و (شيلنى واشيلك) .. ما تخافشى على ما هى لو راحت فى داهيه أعرف ازاي أجيبها تانى وافضل ادوخ فيها وأودبها وأجيبها لغاية الناس ما تهمد والأشيه تبقى معدن (واخدلى بالك يا خواجه) .

■ أخيراً يا أستاذ أبو لمعه تتمنى إيه لمصر ؟

- نفسى مصر تضحك زى زمان زى أيام برنامج (ساعة لقلبك)
ونفسى أنا كمان أضحك بس (لاجل البخت الاسود) كل ما افتح
بقى علشان اضحك ألاقية يتقفل فى وشى !!

زينات صدقي

الخدمة العانس بنت البلد



1913-1978

أشهر أعمالها :

- شارع الحب
- الدنيا جرى فيها إيه
- تحيا الستات
- الأنسة حنفى
- الستات ما يعرفوش يكذبوا
- ابن حميدو
- حلاق السيدات
- شارع البهلوان
- جمعية قتل الزوجات
- شرف البنت
- اسماعيل يس فى البوليس
- الكمساريات الفاتنات
- أيامنا الحلوة
- ذهب
- أربع بنات وضابط

أشهر أدوارها :

- العانس والخادمة بنت البلد
- دور ترتر زوجة حسب الله السادس عشر

أشهر إفيهاها :

- نفسى فى عريس يا رب
- يا اختى يا حلاوتك يا اختى يا جمالك
- كتنا كيتو بنى
- سامحنى يا رب



آلو... مين معايا؟



- السلام عليكم يا ست زينات هانم .
- (هانم) إيه ؟ اسم الله على مقدمك يا (سى مخلوع) ما تسبب الهانم في حالها
- طيب تحبى أنا ديكي بيايه ؟
- أنا (خدامتك) زينات (العانس بنت البلد) أو قل لى يا (ترتر) زى ما كان (حسب الله السادس عشر) بيناديني في فيلم (شارع الحب) .
- نفسك في إيه يا ست (ترتر) ؟
- نفسى في (عريس يا رب) نفسى في راجل أتحرش به ويتحرش بيه ويتجوزنى .
- بسيطه لو عاوزه حد يتحرش بيكى انزلى وسط البلد واتفرجى على التحرش بقى عيني عينك !؟

- (يا اختى يا حلاوتك يا اختى يا جمالك) التحرش بقى عينى عينك فى زمانكم؟!

▪ آى والله يا ست زينات !!.

- آمال فىن الفتوات وأولاد البلد المجدع فىن (فريد شوقى) و (عبد الفتاح القصرى) فىن أبو الدبل (الشاويش عطيه) وفىن (شكوكو) إوعى تقوللى إنهم واقفين يتفرجوا.

▪ للأسف لا عاد فيه فتوات ولا ولاد بلد مجدع وكل واحد بيقول للثانى خلىنا فى حالنا وسايين البلطجية يعملوا الى على كيفهم !!

- ليه (الدنيا جرى فيها إيه؟) وازاى تقفوا تتفرجوا وتسيبوا (الولاي) والستات الغلابه مكسورين الجناح.. ده بدل ما تقولوا (تحيا الستات) ؟

▪ قولى لى إنتى من خلال خبرتك فى (الآنسة حنفى) إزاى نواجه ظاهرة التحرش؟

- شوف يا روح ماما.. أنتم تجيبوا (ابن حميدو) و (حلاق السيدات) ولما يمسكوا واحد (كتاكتو بنى) من الى بيتحرشوا يحلقوا له راسه زلبطة ويجرسوه ويعملوا له فضيحة فى (شارع البهلوان).

▪ طيب ولو طلع بلطجى أو عضو فى (جمعية قتل الزوجات) وضربهم بسنجة أو مولوتوف ؟

- يضربهم بسنجة أو مولوتوف ازاي ؟ وفين (إسماعيل يس فى البوليس) وفين (أربع بنات وضابط) .. سيونى عليه وانا اعمل معاه (غرام وانتقام)

▪ بس متهيألى يا ست زينات الستات بيبالغوا شويه فى موضوع التحرش ده؟ وبيقولوا حاجات ما حصلتش ؟

- تف من بقك ده (الستات م يعرفوش يكذبوا) و (شرف البنت) زى عود الكبريت .

▪ يعنى إنتى شايفه إن المتحرش هابتأدب ويلم نفسه لما نحلق له رأسه زلبطه؟

- وإذا ما اكنشى هايلم نفسه سيونى عليه أجيب له (الكمساريات الفاتنات) يوه قصدى المتحرشات الفاتنات (مارى منيب وجماليات زايد والأنسة حنفى) ونتحرش إحنا بيه وفين يوجعك (قرص وعض) لغاية ما يتوب ويقول حقى برقبتي

▪ والله فكره حلوه وشربات زى دورك فى فيلم (أيامنا انحلوة) و(معبودة الجماهير) .

- يا اختى (يا كتاكيتو بنى) هو ليه التحرش ده ماكنشى على

أيامنا (سامحني يا رب) ؟

▪ أيامكم كان فيه ناس محترمه والرجالہ كانوا بيتكسفوا ويختشوا .

- قطعة تقطع الكسوف (سامحني يا رب) .

▪ تحبى تتمنى إيه فى آخر حوارنا يا ست (ترتر)؟

- أحب أبعت لكم سى (عبد السلام النابلسى) حسب الله السادس عشر علشان تتردحوه شويه وتدوا له دروس فى التحرش لحسن ده خيبه خالص .

▪ حاضر من عيني بس والنبي سلمى لى على أنور وجدى وسى عبد الحليم حافظ وقولى لهم ربنا يرحم زمن الحياء والأخلاق والفن الجميل .

ستكوكو

الأراجوز بتاع المونولوجات



1913-1985



أشهر أعماله :

- فالح ومحتاس
- إوعى المحفظه
- ظلمونى الحباب
- عترو ولبلب
- ظلمونى الناس
- تحيا الرجاله
- يوم فى العالى
- أسمر وجميل

أشهر مؤنولوجاته :

- ورد عليه فل عليه
- حموده فايت يا بنت الجيران
- يا جارحه القلب بإزازه

أشهر إفيهااته :

- عليك كلوب
- يا خرابى



آلو... مين معايا؟



- إزيك يا سى محمود إبراهيم إسماعيل موسى .
- (يا خرابى) لازمتها إيه اليافة دي كلها ما تقول يا (شكوكو) وخلاص
- طيب يا سى شكوكو يا ترى اسمك شكوكو ليه ؟ يعنى سمّوك كده ليه ؟
- (يا خرابى) هو فيه حد فى مصر ما يعرفش سمّونى شكوكو ليه ؟ خش على النت يا جاهل وأنت تعرف .
- بيقولوا على النت إن جدك هو الذى أطلق عليك اسم شكوكو لأنه كان بيربى مجموعة ديوك رومية وفيه واحد منهم كان يطلق صيحة (شكوكو) بوضوح
- (عليك كلوب) يا دُعُف أصل جدى ده كان (فالح ومحتاس) ها أو أو .

- نخش في الموضوع ونقول لك ما رأيك في رئيس الوزراء هشام قنديل ؟
- (ورد عليه .. فل عليه) وكفاية إنه بيعامل القوضى والبلطجة (بحب ودلع)
- طيب ورأيك إيه في أداء الحكومة وسياستها ؟
- سلم لي على الحكومة وقل لها المونولوج بتاعى (الحكومة فايته يا بنت الجيران والتعبان راح يفضل تعبان .. اظهر وبان .. يا بتاع اللومان).
- بمناسبة مونولوجاتك تحب تغنى إيه للفضائيات إياها ؟
- أحب أغنى لها : (يا جارحة القلب بإزازة) .. ونفسك تشبعى لطم في جنازة
- إلّا قل لي شعارك إيه في الحياة يا (شك شك)؟
- شعارى لا مواخذه (مشينا في لجد شحتنا السيجاره ومشينا في الهلس بنينا عمارة) .
- قصدك إيه لا مؤاخذه ؟!
- قصدى الحاله بقت هلس خالص يعني هلس وقلة أدب هلس يهد ما بينيش

- أمال الهلس بتاعك كان إيه ؟
- أنت مخك تخين ليه ؟ الهلس بتاعى كان (نكت ومونولوجات) فاشتهرت وبنيت عمارات وكسبت أوفات بعد ماكنت (نجار) مع أبويا بشحت القروش والشلنات.
- بما أنك كنت نجار تبقى تبع حزب (الكنبة) ؟
- (يا خرابى) ما خلاص الكنبة اتخلّعت وخذت على قفاها .. أنا لا مؤاخذه (حزب الأراجوز).
- (أراجوز) إيه يا سى شكوكو؟ هو ده وقت هزار ؟!
- أنت نسيت إن أنا اشتهرت بالأراجوز الى يضحك الناس على خبيتهم
- والأراجوز ده عاوز يخربها ويقعد على تلها وللا عاوز يقعد على الحيطه ويسمع الزيتة
- (يا خرابى) لا عشت قصدى لامت ولا كنت لو الأراجوز كان كده .. أنا قصدى ألبس طرطور .. وألف وأدور .. وأقول بطلوا غباوه وخللوا العجلة تدور .
- ده موال جديد يا شكوكو ؟
- أيوه ده موال عن مصر الى بقت صعبانه على قوى وعلى فكرة أنا فى حاجة لله وعملت فيلمين من اكثر من ٦٠ سنة عن مصر

(ظلموني الحبايب) و (ظلموني الناس) .

▪ معلّش يا شكوكو أهو يوم في الواطى و (يوم في العالى) .

- ماشى بس (إوعى المحفظة) قصدى إوعى رصيد مصر
يخلص وماتلقوش تاكلوا .

▪ اخيراً ما عندكش حل للى إحنا فيه ؟

- عندى حل إنما إيه (يا خرااابى) مفيش أحلى من كده عليكم
بخطه (عتر ولبلب) .

▪ إلحقنى ولايمنى على الخطه وقل لى يعنى إيه (عتر ولبلب)؟

- يعنى سيبوا (لبلب) يضرب عتر (٧) أقلام ويمسخر بكرامته
الأرض ويأدبه

▪ ومين (عتر) ومين (لبلب) !!؟

- يا (خرااابى) مش عارف مين عتر ومين لبلب ؟ طيب روح
اسأل ماما يا شاطر واتفرج على الفيلم القديم بتاعى اللى اسمه (تحيا
الرجالة) .

▪ طيب مع السلامه و (الصبر جميل) يا (أسمر وجميل) يا
شكوكو أفندى .

ماري منيب

زعيمة حزب الحموات الفاتنات



1905-1969

أشهر أعمالها :

- فيلم لعبة الست
- مسرحية إلا خمسة
- ٣٠ في يوم في السجن
- حماتي ملاك
- عفريته إسماعيل يس
- حماتي بوليس دولي
- حماتي قبله ذرية
- سلفني حماتك
- الحموات الفاتنات
- مسرحية استنى بختك

أشهر أدوارها :

- سنية جنح في فيلم لعبة الست
- شمردل هانم في مسرحية إلا خمسة

أشهر إفيهااتها :

- اسم الله على مقامك

- لا معروف ولا متلوف
- عقبال أملتك
- طوبه على طوبه خلى العركة منصوبة
- جتك نيله
- مدوبا هم اتنين
- اللى ينشك فى ننى عينه
- دمك شربات يا مضروب
- أنت جايه تشتغلى إيه ؟
- ألا هلا على الجد
- الشر بره وبعيد
- يا كسوفى



آلو... مين معايا؟



- نهارنا أبيض وخالى من البكش يا ست (سنيه جنح) إزيك ولازى جوزك (إبراهيم نفخو) وأخبار (لعبة الست) إيه ؟
- إبراهيم نفخو (اسم الله على مقامك) فضل يتنفخ لحد ما فرقع من أحوالكم ولعبة الست بغت (لعبة التت) فى عصركم الأغبر.
- طيب والست (كاريوكا) والأستاذ (بلاليكا) ؟
- كلهم اتحبسوا (عقبال أملك) (٣٠ يوم فى السجن)؛ بتهمة إشاعة الفرفشة فى زمن النكد !
- وأنتِ فىن من زمان من ساعة ما مِت سنة ١٩٦٩ ما حدش شافك ؟
- (جتك نيله) فى ملافظك .. أما مامتش يا روح الدلعلى أمك أنا زى (عفرية إسماعيل يس) بسبع أرواح .

- طيب يا ست (مارى سليم حبيب نصر الله) قصدى يا مارى منيب عامله إيه دلوقت ؟
- (عامله فضلة خيرك) محشى (اعتصام) فى بيت بتتى وقلت لها تخرط ملوخية (إضراب) وتقطع طريق جوزها (الى ينشك فى ننى عينه) .
- ليه بس كده ؟ ما المعروف أحسن .
- و (لا معروف ولا متلوف) و (طوبه على طوبه خلى العركة منصوبه) لحد المنيل على عينه ما يعمل إصلاح اقتصادى لعجز ميزانية البيت .
- طيب ولو بسلامته ما عملش إصلاح ؟
- ها اخطف (الواد الحيله) ابنه واطلب منه (فديه) واهرب على كوريا الشماليه .
- واشمعنى كوريا الشماليه ؟ هى (فرقة الريحانى) هاتعرض مسرحية هناك ؟
- لا وأنت الصادق أصل كيم يونج رئيس كوريا لما شاف الفيلم بتاعى (حاتى قبلة ذرية) طلب من (عبد الفتاح القصرى) يتوسط له علشان ياخذنى و (يفرقعنى) فى أمريكا .
- بمناسبة إنك قبلة ذرية تفتكرى نتخلص ازاي من البلطجيه ؟

- هاهاها (تضحك ضحكتها المميزة ولكن مش عارف أكتبها ازاي) سيونى عليهم وأنا (أعمل لهم عمل) قصدى (حزب) يأديهم ويلمهم ويقطع رجلهم ويخرب بيتهم .

■ عمل إيه؟ وحزب إيه؟ اللى هاياديهم ويلمهم ويقطع رجلهم!!؟

- حزب (الحموات الفاتنات) ما هو كل بلطجى لو له حماة تدى له على دماغه وتطين عيشته وعيشة اللى خلفوه ماكنشى هايلاقى وقت يبقى بلطجى .

■ والله فكرة مش بطالة وخصوصاً إنك عندك خبرة و (مدوباهم اتنين) .

- (يووو دمك شربات يا مضروب) انت اسمك إيه ؟

■ اسمى قطاميشى الحلمتيشى اللى زيه مفيشى .

- لا أنتى اسمك أبدو (عبده) فلى يا أبدو (أنتى جايه تشتغلى إيه)؟

■ أنا جاي أعمل معاكى حوار وأسألك عن الفرق بين (حماتى ملاك) و (حماتى بوليس دولى) واعمل إيه لو واحد قال لى (سلفنى حماتك) ؟

- شوف يا مضروب (الله هلاّ على الجد والجد هلاّ هلاّ عليه)

الكلام ده كان كلام سيما كله مبالغه وأونظه وأنا كنت حماة طيبة
وبنت حلال حتى اسأل جيرانى فى شبرا .

▪ ورأيك إيه فى الناشطات العاريات بتوع الفيس بوك ؟

- (الشربره وبعيد) ربنا يكفيننا شرهم وشر الفيساتوك والفيس
بوك (يا كسوفى) فىن الرجاله اللى دمهم حامى فىن (يوسف بيه وهبى
وشرفنطح والشاويش عطيه) ؟ وللا الرجاله فى زمانكم بقوا
(خرنجات وبرادع) لامواخذة.

▪ أخيراً إيه رأيك فى اللى بيحصل فى مصر ؟ وهو صحيح مصر
رايحه فى داهيه ؟

- شوف يا (ابو حلموس) الساعة دلوقت (إلا خمسه) يعنى
فاضل خمسه وخمسه واحتمال الداهيه تروح سكه تانيه اقعد و
(استنى بختك) .

عبد الفتاح القصري

المعلم ابن البلد المجدع والحانوتي عند اللزوم



1903-1963

أشهر أعماله :

- سكر هانم
- سي عمر
- حماك تحبك
- العقل زينة
- بيت الأشباح
- السوق السوداء
- معلش يا زهر
- الصبر جميل
- إسماعيل يس في مستشفى المجانين

أشهر أدواره :

- إبراهيم نفخو
- عبد المجيد ساطور
- المعلم حنفي
- شاهين الظلط
- أبو طعمة

أشهر إفيهاته :

- يا كروديا
- معلهش تنزل المره دى
- على سن ورمح
- نورماندى تو
- بلا قافيه
- يا أرض اخسفى ما عليكى
- أنا كلمتى ما تنزلش الأرض أبدا
- يا صفايح السمنة السايحة
- لا ممكن أبداً



آلو... مين معايا؟



▪ إزيك يا معلم (توتو) .

- توتو مين (يا كروديا) ده أنا المعلم عبد الفتاح القصرى (على سن ورمح)

▪ ما غلطناش مش (عبد الفتاح) بيدلعوه (بتوتو) ؟

- بلاش قلة قيمة يا افندى انت وقل لى يا (معلم حنفى) أو (يا أبو طعمة) أو (عبد المجيد ساطور) أو (إبراهيم نفخو) أو (شاهين الظلط) أو أى شخصية (شخصية) من الشخصيات اللى سخصتها (شخصتها يعنى مثلتها) لامواخذه فى السیما .

▪ طيب (يا أبو طعمة) إيه رأيك فى (سكر هانم) قصدى حكومتنا الجميلة ؟

- حكومتكم الجميلة (ها أو) !! جميلة ازای ؟ أنا مش شايف فيها ريحه الجمال ده أنا جنبها أبقى مانلين مونولو (مارلين

مونورو!!

▪ يعنى الحكومة مش عاجباك يا إبراهيم يا نفخو؟

- إبراهيم نفخو .. (ها أو) ده الناس هم الى (اتنفخوا) من الحكومة!!

▪ أفهم من كده إن أداء الوزراء والمسئولين مش عاجب سيادتك؟

- أيوه مش عاجبنى (بلا قافيه) عارف ليه؟ علشان الوزير والمسئول من دول يطلع ويصرح لامؤاخذه زى المعلم حنفى ويقول (أنا كلمتى ماتنزلش الأرض أبداً) يقوم طالع له إضراب أو اعتصام تلاقيه يلحس كلامه ويقول (معلش تنزل المره دى)!!

▪ بمناسبة (تنزل وماتنزلش) أنت شايف (سفينة مصر) رايحة على فين؟؟

- مابلاش شايفها رايحه على فين دى .. أنت مش شايفنى (أحول) بعيد عنك ولو قلت شايفها رايحة فين يبقى هتروحوا فى داهية مسيحة .

▪ يا ترى أنت مش شايف إن سفينة مصر دى بتفكرك بالمركب (نورماندى تو)

- (نورماندى تو) ألف رحمة ونور عليها دى أول ما نزلت البحر

غرقت بعد ما صرفت عليها دم قلبي واديت لها كل الى نفسها فيه
عيش وحرية وعداله اجتماعية !

■ يا راجل عيب عليك فال الله ولا فالك (يا عبد المجيد يا
ساطور) يا نصاب.

- أألا هلا هلا أنت عاوز تلبسنى تهمة يا جدع والله لاجيب
بنتى (الأستاذة فاطمة) ترفع عليك قضية يا حرامى (العقد) يا بتاع
(المهرجا الهندى) .

■ بقى كده ! يعنى انت بتهددنى يا معلم بالأستاذة فاطمة ؟

- أيوه ولو مالمتشى نفسك ها اجيب لك كمان بنتى (الآنسة
حنفى) تشكل الوزارة الجديدة وتعلمكم الأدب وتقضى على
التحمرش (قصده التحرش)

■ لا لا بلاش يا معلم .. الطيب أحسن .

- أيوه كده .. خليك حلو علشن (حماتك تحبك)

■ لو عشت فى زماننا تحب تقول إيه (للأحزاب) الى بلغ عددها
أكثر من ٧٠ حزب ؟؟

- أحب أقول لهم (يا أرض اخسفى ما عليكى) ويا ريتنى أرجع
(حانوتى) زى فيلم (القلب له أحكام) واشيلهم مرابعة على القرافة
.. ما اعرفشى عاملين خوته ليه ؟ ده (العقل زينه) .

- تحب تقول حاجة لهشام قنديل ووزارته ؟
- أحب أغنى لهم وأقول لهم (يا صفائح السمنه السايحه .. يا براميل الزبده النايحه) .. كفايه بقى هانفطس من ريحة الخبيهِ الفايحه .
- أحوالنا دلوقت ما بتفكر كشى بأفلامك (بيت الأشباح) و(بيت التناش) و(السوق السوداء) .
- لا وأنت الصادق بتفكرنى بأفلامى (الدنيا بخير) و (اوعى تفكر) و (الصبر جميل) .
- طيب (لو كنت غنى) تعمل إيه ؟ وللا ده (لا ممكن أبداً) ؟
- لا ممكن ليه ده أنا لو كنت غنى أوزع ثروتى على البلطجيه بتوع الإضرابات والاعتصامات والمظاهرات علشان يقعدوا فى بيوتهم ويسيبوا (نورماندى تو) تعدى البحر لشط الأمان .
- طيب لو خدوا ثروتك وضحكوا عليك وما بطلوش تخريب ومالموش نفسهم
- يبقى (معلش يا زهر) مفيش غير حل واحد اروح أقابل (إسماعيل يس فى مستشفى المجانين) .

الدكتور شديد

نجم ساعة لقلبك



1931-1997



أشهر أعماله :

- إشاعة حب
- إسماعيل يس في مستشفى المجانين
- جوزين وفرد
- كرنب زبادى
- زوج للإيجار
- ملكة إغراء
- الست نواعم

أشهر أدواره :

- دور الرجل الذى ينسى فى برنامج ساعة لقلبك مع لمعلم شكل والرغاية وأبو لمعة والخواجه بيجو .

أشهر إفيهاته :

- يا رب يا اخويا يا رب !!
- سبحان من أبدعك
- أنت اتعشيت وللا لسه؟
- ده أنت لقطة

- و ماله يا اخويا مش عيب
- يا ملكوت الله
- أيوه كده هللو اورا بعضكم هللو
- ما أبدعك ما أروعك
- إيه الفتوح دى كلها
- ده أنت مهول
- ربنا يزيد ربنا يبارك



ألو... مين معايا؟



- فينك يا د. شديد؟ مش باين ليه من زمان؟
- د. شديد مين يا ابني؟ النمره غلط.
- النمره غلط إزاي؟ مش أنت فرحات عمر يعني د. شديد بتاع (ساعة لقلبك)
- ايوه يا ابني عندك حق باين أنا هوه (د. شديد) اللي بتقول عليه ما تأخذنيش أصلي من ساعة مامت وأنا بقيت أنسى.
- يعني بتنسى وأنت ميت زى ماكنت بتنسى وأنت عايش؟!
- (وماله يا اخويا) هو النسيان حاجة وحشة... ده النسيان نعمة في زمانكم
- عاجبك حال البلد يا د. شديد؟
- مالها البلد يا بني؟ ما هي (حامل) وزى القمل ربنا ينتعها بالسلامة (يا رب يا اخويا يا رب) تولد لنا شوية عيال يملوا علينا

البيت إضرابات واعتصامات ومظاهرات .

▪ أنت بتخرّف ؟ وللا عارف اللى بيحصل ويتستهيل ؟!

- قول لى قبله يا ابنى هو (أنا اتعشيت وللا لسه) ؟

▪ اتعشيت ؟! هو حد ليه نفس يتعشى ؟

- أيوه أنا نفسى اتعشى محشى انفلات وكفتة فوضى وسلطة
زبالة واشرب شويه نور مقطوع (يا سلام) دى حاجة تجيب لك
مغص وزارى من اللى قلبك يحبه !

▪ مغص وزارى وللا تعديل وزارى ؟

- (وماله يا اخويا مش عيب) مغص وللا تعديل كله محصل
بعضه كله بيوجع البطن (يا رب يا اخويا يا رب) لكن قل لى أنتم
لقيتم مصر وللا لسه تايهة منكم ؟

▪ مش لاقينها ودورنا عليها فى كل حته !!

- طيب ما تدوروا عليها كويس يمكن مستخبة عند (المعلم
شكل) عشان يحميها

▪ والمعلم شكل ده نلاقه فين ؟

- هتلاقه مع (أبو لمعة والخواجة بيجو والرغاية) يا إما فى
طابور البنزين يا إما فى طابور العيش يا إما فى طابور اللى يروح ما
يرجعش (يا رب يا اخويا يا رب) .

- دورت عليها هناك قالوا لي (البلاك بلوك) قطعوا طريق القرافه وخطفوا المعلم شكل .
- (وماله يا اخويا) ما يخطفوه ندور تاني إحنا ورانا إيه .
- أبوس إيدك يا د. شديد قل لي (جملة مفيدة) .
- (يا رب يا اخويا يا رب) بتقوللي إيه حضرتك ؟ عاوز (طنط مفيدة) حاضر يا اخويا من عيني خد النص جنيه ده واقطع تذكرة وروح قابلها هاتلاقيها قاعدة في ميدان التحرير .
- اللهم طولك يا روح .. وبعد ما لاقيتها ؟
- (يتم المراد من رب العباد) وشوية رقص على دربكة واتلافات ونقعدع الحيطه ونسمع الزيتة .
- أنا مش فاهم حاجه ؟
- (وماله يا اخويا هو عيب) وللا يعني أنا اللي فاهم حاجه .. (أيوه كده هللو ورااء بعضكم هللو) .
- مين دول اللي يهلوا ؟!
- هو فيه غيرهم (الإنقاذ و ٦ أبريل والألترس) وابقى أرتس لي إزازه مولوتوف ساقعة من الشلاجة .
- ارحمني يا د. شديد واتكلم بجد شويه ؟

▪ - جد مين يا اخويا أنت عاوز مين بالضبط ؟ تيجي نلعب
(جوزين وفرد)

▪ وأخرتها إيه معاك ؟

▪ - أخرتها الستارة تنزل والجمهور يقول سيما أونظه عاوزين
فلوسنا ويعملوا مظاهره ويخطفوا الفيلم والبطل والبطله ويجيبوا
هشام قنديل يتفاوض معاها .. لكن قل لى يا ابنى هو أنا مت وللا
لسه عايش ؟

▪ متهاى لى إنك مت سنة ١٩٩٧ .

▪ - والنبي صحيح يا ألف بركة الحمد لله إنى مش عايش فى
أيامكم السوده دى !!

كلايت تاني مرة مع الدكتور شديد

(بعد الحوار الماضي مع د. شديد فوجئت برقم مجهول يرن على الموبايل).

▪ ألووه إزيك يا أستاذ قطايف .

- قطايف مين ؟ النمرة غلط يا أخ .. أنا قطامش مش قطايف

▪ وماله يا ابني قطامش وللا قطايف أهو كله بيتاكل (ي رب يا اخويا يا رب)

- (يا رب يا اخويا يا رب) يبقى حضرتك أكيد د. شديد

▪ أيوه يا ابني أنا هوه (د. بليد) قصدي (د. شديد) .. خير طالبنى ليه ؟ عاوز حاجه ؟

- لا مش عاوز حاجه بس أنت اللى طالبنى مش أنا اللى طالبك يبقى أنت اللى عاوز حاجه .

▪ طالبنى ولا طالبك ؟ إيه اللخبطة دى .. أيوه أيوه افكرت أنا اللى طالبك .. (ده انت لقطة سبحان مين أبدعك يا ملكوت الله) تيجي نلعب (دور شطرنج) ؟

- أنت بتسلى وللا بتتريق ؟! ما تخش فى الموضوع .
- حاضريا اخويا .. ها اخش اهو .. افتح بس أنت الباب وأنا أخش على طول .. هو أنت يعنى فتحت وأنا ما خشيتش .. أما أنت تحفة صحيح .
- الصبر يا رب ما تقول عاوز إيه يا د. شديد يا إمّا ها اقفل السكة .
- وماله يا اخويا هو عيب ما تقفل وللا اقول لك .. أنا افكرت .. أنت تعرف حد اسمه (بلاك توك) لابس فى راسه شراب مقلوب ومش باين له خلقة ؟
- قصدك تقول (البلاك بلوك)؟
- برافو عليك (ما أبدعك ما أروعك) .. أصله بعث لى إيميل لامؤاخذه على (القرافه دوت كوم) وطالب القرب منى عاوز يبقى (زوج للايجار) وقال لى إنه من التوك بلوك .
- إوعى يا د. شديد توافق تجوز بتتك لحد من (البلاك بلوك) دول جماعة لامؤاخذه ..
- (وماله يا اخويا) لامؤاخذه ليه ؟ مالهم الجماعة ؟ هو عيب يكون من الجماعة ؟ أنا عموماً قلت له يقابلنى السنة الى فاتت عند (إسماعيل يس فى مستشفى المجانين) .

- الحمد لله إنك توهته واديته ميعاد السنه الى فاتت .. لكن أنت عندك بنات على وش جواز؟؟
- أبوه أمال إيه عندي فضلة خيرك بنت حلوه مرعرعة وشها يقطع الخميرة من البيت .
- وبتك دي إسمها إيه ؟ وعندها كام سنة ؟
- (يا رب يا اخويا يا رب) .. بتتى اسمها (الحكومة) وفي (K.G.1) وبتاخذ دروس خصوصية عند اسم الله د. هشام قنديل لحد ما بقت آخر قندلة وبتاكل (كرب زيادى) .
- وازاى بتك لسه في (K.G.1) وتتجوز ؟!
- (وماله يا اخويا) ده الجواز سترة والدكاترة قالوا الى أرضعها كل يوم رضعة فضائيات مسمومة على وجبة مولوتوف إضرابات واعتصامات علشان تورم وتتخن وتكبر بسرعة .
- (إيه الفتوح دي كلها ده أنت مهول ربنا يزيد ربنا يبارك) علشان بتك تكبر وترعرع .
- (وماله يا اخويا) ما هي لازم تكبر وترعرع وتفرقع في وشنا أصل بتتى دي لامؤاخذه (ملكة إغراء) في الفوضى ومتربية في مدرسة (الست نواعم) وتشوف خلقتها تلاقيها حاجة مسخرة .
- مش عيب عليك تقول على بتك كده ؟!

■ لا يا اخويا مش عيب أصل أنا لما خلفتها كنت بتوخم على
كوكتيل عبد السلام النابلسي وأمين الهنيدى ومحمد عوض
فطلعت مشلطة وملخبطة .. لكن قول لى انت (عملت الواجب) ؟
- واجب إيه ؟ ما تركز معايا يا د. شديد .. بالمناسبة انت دكتور
فى إيه ؟

■ والنبي ما اعرف يا اخويا .. أنا رحت آخذ (دكتوراه فى
الفلسفة) لقيت نفسى (دكتور بيطرى) لكن قول لى يا ابنى أنا
(رفست) السكة قصدى قفلت السكة فى وشك وللا لسه ؟
- لا .. لسه يا د. شديد .

■ طيب كويس إنك فكرتني اقفل السكة فى وشك .. وعلى فكرة
بنى الى اسمها الحكومة ما طلعتشى بنى طلعت بنت الجيران
وهربت مع واحد بتجبه اسمه ميدان التحرير وماتت الشهر الجاى
عقبال عندك والدخلة الشهر الى فات ما تنساش تروح الفرح وتقرأ
لها الفاتحة (يا رب يا خويا يا رب) .

الخواجة ييجو

رفيق أبو لمعة في مملكة الفشر



1930-1986



أشهر أعماله :

- برنامج ساعة لقلبك
- إسماعيل يس في مستشفى المجانين
- حماة ملاك
- شارع الحب

أشهر إفيهاته :

- يا لختوى (يا دھوتى)
- يا النافوخ بتاع الأنا



آلو... مين معايا؟



▪ إزيك يا خواجه بيجو .

- أخلا (أهلا) يا خبيبي .. مين خضرتك ؟

▪ مش مهم أنا مين .. المهم أنت عامل إيه مع أبو لمعة في
الآخرة ؟

- (يا لختي) ما تفكرنيش وخياة والدك ده أنا مت من هنا
وهو جه ورايا من هنا وكل يوم يلزم الميتين وينزل فيهم فسر (فسر)
خليك معايا على الخط واسمع بنفسك .

▪ إيه يا واد يا خواجه مش عيب تهرب من أبو لمعة الأصلي
وتغير رقم موبايلك ؟

- (يا النافوخ بتاع الأنا) أنت ورايا ورايا .

▪ أعمل إيه يا خواجه ؟ ده أنا بحبك وافتكرتك امبارح لما
دخلت اتفسح في بطن الأسد بتاع كوبرى قصر النيل .

- يا خبر اسود !! تتفسخ في بطن الى اسمه أسد قصر النيل ..
إزاي ؟!!

▪ قلت لى إزاي .. (وجب) أقول لك .. امبارح نزلت اشم هوا
في ميدان التحرير وكان يوم جمعه وعينك ما تشوف إلا المولوتوف
والقنابل المسيلة للدموع .

- أيوه أيوه ما انا سفت (شفت) الفيلم ده في السيمما قبل كده .

▪ قوم إيه طلع يجرى ورايا البلطجية ويقولوا إمسكوا أبو لمعة
بتاع الفلول طلعت أجرى وهم إيه ؟ يجرؤا ورايا وفجأة ..

- خصل إيه يا خبيبي ؟ سييت مفاصلى (مفاصلى) .

▪ لقيت لك البلطجية ورايا والأسد قدامى .. تعمل إيه يا واد يا
أبو لمعه ؟ .. سهيت الأسد وهو فتح بقه بيتاوب ورحت ناطط
وداخل جوه بقه .

- (يا لخوتى) نظيت في بق الأسد وأكلك (همّ يا جمل) ؟؟

▪ فشر يا خواجه .. ده أنا لقيت الأسد كان واكل كوارع وبُقه
ملزق قلت فرصه واتزفلطت ونزلت في معدته ولقيت سكه ضلمه
مشيت فيها ولاجل البخت الاسود .

- استنى سويه (شوية) .. الأسد معدته فيها سكه ضلمه ؟!

▪ أيوه يا خواجه وحياة راس والدك وفضلت ماشى أحسن

أتارى بطن الأسد فيها سرداب .. فضلت ماشى فى السرداب ..
عارف لقيت نفسى فين ؟

- (يا النافوخ بتاع الأنا) .. لقيت نفسك فين ؟ فى خديقة
الخيوان .

▪ (لأ وأنت الصادق الكذب خيبة) .. لقيت نفسى قدام
الخديوى إسماعيل بطربوشه ونياشينه قاعد فى قصر عابدين .. ولما
الخديوى شافنى (لابس الجلابيه الدبلان المخططة بتاعت أخويا
شلبى) ما عرفنيش قلت له أنا أبو لمعه راح طالب لى القهوة وقعد
يعيط .

- (يا لخوتى) !!! يا النفوخ بتاع الأنا وكان بيعيط ليه سى
الخديوى دى ؟

▪ أصل البلطجية بعيد عنك خطفوا أبوه إبراهيم باشا أبو اصبع
.. خطفوه بالحصان بتاعه من ميدان الأوبرا وعازين فديه ١٠٠ جمل
و ٣ مراكب محملين سولار وبنزين وغاز وأنايب بوتاجاز
وصكوك وكوبونات وفانلات وشرابات يا إما يحلق لامؤاخذه شنبه
ودقته ويقول أنا مش راجل (أنا مرّه) يا إما يقتلوا أبوه .

- أنا الحق (الحق) على انى باسمع فسرك (فسرك) .. بس
ماسى (ماشى) هااه وبعدين ؟

▪ قلت له ولا يهملك يا سمعه قصدى يا خديوى إسماعيل أنا

ها اجيب لك أبوك وفجأة يا واد يا خواجه الأسد جاله مغص من المولوتوف وراح مرجع الى في بطنه والاقى نفسى فين ؟ في ميدان القلعة وإبراهيم باشا راكب حصانه وطايح بسيفه في البلطحية الى كانوا خاطفينه .

- خلوه (خلوه) دى !! ومحمد على أبوه كان فين ؟

▪ كان واقف يشم هوا في بلكونة القلعة وقال له عفارم عفارم هاتهم نعملهم كفتة في مذبحه القلعه .. أصل محمد على ده راجل على كيفك ذكر بصحيح

- غريبه دى ؟ وعاملهم كفته وعزمك على الغدا ؟

▪ (لا وشرفك الكذب خيه) أصل هشام قنديل والوزراء جم يجرؤا حقك علينا يا باشا سيهم وانبي يا باشا لحسن يقولوا عليهم شهداء والبلد تولع .. وباظت الكفتة يا خواجه إهه إهه .

عبد السلام النابلسي

الشهير بحسب الله السادس عشر



1898-1968

أشهر أعماله :

- فيلم علموني الحب
- الحموات الفاتنات
- فيلم شارع الحب
- عفريته هانم
- فيلم بين السماء والأرض
- فتى أحلامي
- عاطل بالوراثه

أشهر أدواره :

- غراب صاحب جنة العصافير
- عاشور قلب الأسد
- حسب الله السادس عشر زوج سنية ترتز
- بتاع مساج
- رقصة بوم تيكا بوم
- منوم مغناطيسى

أشهر إفيهاته :

- يا أيتها السماء صبي جام غضبك على الأغبياء
- أنا كده طبعي كده خلقتي كده
- وسطى وقع منى .. هاتوالى وسطى
- أنا نار أنا ولعه أنا دينامو
- إفرجها يا كريم إفرجها يا باسط



ألو... مين معايا؟



- أنت فين يا سى عبد السلام؟ رحت فين وأمك بتدور عليك؟
- رحت (جنة العصفير) علشان العصفير هم اللى (علموني الحب) وعلمونى أطير زى الريشة أصل (الدنيا ريشه فى هوا).
- يعنى هربت من أمك زى (بطرس غالى وحسين سالم) اللى هربوا من مصر؟
- فشر أنا عمرى ما أهرب ده أنا (حسب الله السادس عشر آخر سلالة حسب الله) أنا اتجوزت (سنية ترتر) وعملنا ائتلاف للسيطرة على مفاصل أمة وعلاجها من هشاشة النظام قصدى العظام.
- بس فيه ناس شافوك فى ميدان التحرير بتعلم البلطجية رقصة (بوم تيكابوم)؟

- (يا أيتها السماء صبى جام غضبك على الأغبياء) أنا ماكتش رايح لكده يا (بجم) أنا كنت رايح أشوف مصر اللى ركبت فى

أسانسير مجمع التحرير وكانت طالعة للنهضة وبعدين الأسانسير
اتعطل وبقت متعلقة (بين السماء والأرض) ورحت أنقذها .

▪ حلوه دى ؟ برافو عليك ما أنت كنت صحفى وشاعر قبل ما
تبقي ممثل يعنى كلمنجى درجة أولى و(عاطل بالوراثه) ووشك
(أولد فاشون) بس بتسلك فى كل حاجة !!

- (أنا كده خلقتى كده مولود كده) .. وسمعت إن الحكومة
بعنت قطار سكه حديد لميدان التحرير لتوزيع صكوك وكوبونات
وفانلات وشربات ورحت آخذ نصيبى

▪ وأخذت نصيبك وللا القطار ما وقفشى فى المحطة ؟

- نصيب إيه وقرف إيه ؟ ده أنا لقيت فى الميدان هشام قنديل
بيجرب الوزراء ويملا الزمبلك بتاع كل وزير ويقف يتفرج عليه
لحد الزمبلك ما يخلص يرميه ويجيب غيره .

▪ طيب ما حاولتش تغنى له (عبد السلام النابلسى ضرب
الوزارة بالكرسى) ؟

- حاولت بس (وسطى وقع منى) وفضلت أتحايل على الناس
وأقول لهم (هاتوا لى وسطى من تحت) قالوا مالناش دعوة ولقيت
واحد بلطجى خطف وسطى وطلع يجرى وطلب فدية !

▪ وعملت إيه ؟ قدمت بلاغ للنيابة أو للداخلية ؟

- بلاغ مين هو حد فاضى لى .. لكن ربنا بعث لى واحدة اسمها (مدام لَبَيْخ) وزنها ١٠٠ كيلو لحم وعليهم ١٠٠ كيلو شحم كنت عملت لها (مساج) فى فيلم الحموات الفاتنات فصعبت عليها وفتحت باب التبرعات لشراء وسط جديد لحضرتى بدل وسطى اللى اتخطف .

▪ هاااه وجت لك تبرعات ؟

- يووه كثيره بس (كرامتى) يا حضرة منعتنى وقلت لازم أجيب وسطى بنفسى وعنهما ورحت عامل (تنويم مغناطيسى) لحوالى ٥ آلاف واحد كانوا ماشيين فى ميدان التحرير .. آمال إيه (ده أنا نار ده أنا ولعه ده أنا دينامو) وخليت كل واحد يضرب التانى على قفاه .

▪ ربا ترى فى الآخر لقيت وسطك ؟

- لا بس لقيت البلطجى اتلى سرق وسطى وكل ما آجى أنومه مغناطيسى وأقول له (نام) يقول لى (نام أنت) لحد ما نمت أما وجت (سنيه ترتر) ودلقت على راسى حلة ملوخية علشان تفوقنى فقلت (إفرجها يا كريم إيسطها يا باسط) وقعدت على الرصيف أغمس وآكل .

- مش عيب عليك تتهزأ كده وأنت (عاشور قلب الأسد) ؟
عاشور مين قلب الأسد ؟ ما خلاص عاشور ساب البلد .. المهم أولاد الحلال جابوا لى وسط تانى (صينى) من شارع عبد العزيز ما

اعرفشى مسروق وللا مضروب وعليه هدية آى باد وآى فون وموبايل جلاكسى بيغنى (قلبي القاسى يحب ويصبح ناسى) .

▪ ما عندكشى تفسير للى بيحصل ده ؟

- لا معنديش روح اسأل (عفريته هانم) وابنها (فتى أحلامى) فى بورتو طره . أما أنا فنويت أرجع (للسينما الصامته) لأنى حاسس أنى فى زمانكم ده عامل زى (فريد الأطرش فى الزفة) .

▪ مالك مستعجل وقايم رايح على فين ؟

- عندى ميعاد مع صباح وعبد الحليم حافظ فى (شارع الحب) وللا انتم قفلتوه بالاعتصامات والمظاهرات أبوكم السقامات .

عبد المنعم إبراهيم

فتافيت السكر



1924-1987



أشهر أعماله :

- سكر هانم
- الثلاثية (السكرية وقصر الشوق وبين القصرين)
- فيلم طاقة الإخفاء
- مسرحية سكة السلامة
- إشاعة حب
- موهوب وسلامة (بالإذاعة)
- السفيرة عزيزة
- مقال عطييات
- السلطان الحائر
- مسمار جحا
- لوكاندة المفاجآت
- حلاق بغداد
- معروف الإسكافي
- موعد مع إبليس

أشهر أدواره :

- فتافيت السكر هانم
- عصفور قمر الدين

- ياسين في ثلاثية نجيب محفوظ
- أستاذ عجب مدرس اللغة العربية

أشهر إفيهاته :

- إخص عليك يا خاين يا ناكر الجميل
- إوعى تمسكنى إوعى تحوشنى
- كده مرتاح لا قهوة ولا شاي
- أحبك يا أبيض
- وهاتفصل واقف كده يا حيطة ما تتحرك
- العلبة دى فيها فيل
- تافه غبار عفار تراب
- يا نمس يا ثعلب يا ألبان



آلو... مين معايا؟



- آلو.. مين معايا؟ مين سيادتك؟
- (إخص عليك يا خاين يا ناكر الجميل) أنت مش عارفنى ده أنا ياما ضحككتك.. سيبنى أقفل السكه (إوعى تمسكنى إوعى تحوشنى)
- بالراحه شويه .. أنت صوتك مش غريب على بسر حاول تفكرنى بنفسك
- أنا (فتافيت السكر هانم) .. أنا (عصفور قمر الدين) .. أنا (موهوب وسلامه) .
- أهلاً أهلاً يا سى موهوب ... (نجيب قهوة نجيب شاي نجيب شلثة علشان ترتاح)
- (كده مرتاح لا قهوه ولا شاي) .. أخيراً أفكرتنى أنا عبد المنعم إبراهيم
- وفيه حد بقدر ينسى الأستاذ عجب مدرس اللغة العربية فى

(السفيرة عزيزة) وعصفور قمر الدين في (طاقة الإخفاء) وياسين ابن السيد أحمد عبد الجواد في (الثلاثية) ؟

- (أحبك يا ابيض) لكن قل لي الحاله ملطشه معاكم اليومين دول كده ليه ؟

■ والله ما أنا عارف يا سى عصفور باين عين وصابتنا وماشين في سكه سد .

- (وهافضل واقف كده يا حيطة ما تتحرك وتعمل حاجه) .. تعال معايا على (سكة السلامه) وابعد عن سكة الندامة وسكة الى يروح ما يرجعش .

■ ما أنا كنت عاوز أروح سكة السلامه بس سمعت (إشاعة حب) ووقعت في (مقابل عطيات) .

- قصدك (إشاعة فوضى) و (مقابل حكومة) وبالتأكيد الوزراء مختارين مع (السلطان الحائر) ومش عارفين إزاي يخلعوا (مسمار جحا) الى بتوع (الإنقاذ) دقوه ؟!

■ الله ينور عليك وإحنا محتاجين دلوقت (طاقة الإخفاء) للقضاء على اللهو الخفى والفلول والأشباح المستخيه وراء الكواليس - لا أنتم مش محتاجين طاقة الإخفاء انتم محتاجين (علبة) فيها وصفة سحرية علشان تصرف العفاريت وتحط عود في عين الحسود .. خد أدى العلبة السحرية .

- وريني كده .. إيه اللعبة دي ؟ فيها إيه ؟
- (اللعبة دي فيها فيل) .. طراخ .. (صوت صفعة قلم) .
- مش اللعبة دي بتاعت توفيق الدقن الى يقول (ألو يا مُم) ؟
- (آه يا نمس يا تعلب يا أولعبان) .. يعنى أنت عارف إن فيها فيل وسايب الفيل مستخبي ما تقوم تطلع الفيل وتخليه يدوس على الفوضى ويعمل كارت إرهاب .
- ما أنا كنت عاوز أطلع الفيل بس هشام قنديل خوَفني وقال لي الفيل هايطيح في البلد ومش هاعرف نسيطر عليه لإننا مش عارفين الفيل ده معانا وللا مع الناس التانيين ؟!
- الفيل ده ممكن تروّضه وتضربه على قفاه وتسيطر عليه ويبقى زى العجينة في إيدك .. وإن سبته تلاقيه زى الوحش الكاسر المفترس .
- يسلم بقك يا (سى عصفور) . لكن قول لي أنت شايف مصر عاملة إزاي دلوقت ؟
- مصر دلوقت عاملة زى (لوكاندة المفاجآت) تفتح أوضة تلاقي عفريت تفتح الثانية تلاقي شيخ عاوز يصرف العفريت والثالثة فيها بلطجي بيضرب العفريت والرابعة فيها رقاصة بترقص للعفريت .
- طيب والعمل إيه يا سى (ياسين) يا ابن سى السيد عبد الجواد ؟
- العمل هو (بحبك يا ابيضر) يعنى الناس تحب بعضها

علشان (حلاق بغداد) ماي جيش يحلق لكم على الزيرو وعلشان (معروف الإسكافي) ماي جيش يضربكم بالصرمه القديمه .

▪ طيب يا (سى عصفور) ما تجيب أخوك (بندق) وأبوك قمر الدين (محمد عبد القدوس) وأمك (جماليات زايد) وفرقة فيلم (طاقية الإخفاء) وتيجوا تطاردوا الفساد وتطهروا البلاد .

- يفتح الله أنا في فترة استجمام من الدنيا وعندى ميعاد في بلدى (ميت بدر حلاوة) .

▪ يا حلاوة عليك يا حلاوة يعنى هاتسيينا وتمشى يا ندل يا مزبلح ؟!

- عيب ما تتكلمش كده مع (فتافيت السكر هانم) يا وقح أما صحيح إنك (تافه غبار عفار تراب) .

▪ يبقى أكيد أنت خاين وعاوز تخلع وعندك (موعد مع إبليس) .

- لا وأنت الصادق عندى ميعاد مع (السفيرة عزيزة) مع السلامه بقى وخطوه عزيزه .

أمين الحنيدي

الشيخ علام بتاع الأحلام



1925-1986

أشهر أعماله :

- مسرحية حلمك يا شيخ علام
- الحديق يفهم
- مسرحية لوكاندة الفردوس
- مسرحية عبود عبده عبود
- فيلم أشجع رجل في العالم
- مسرحية أصل وصورة
- فيلم شفيقة ومتولى
- ٢٠ فرخة وديك
- سد الحنك
- جوزين وفرد
- الدنيا مقلوبة
- سبع وللا ضبع
- أنا آه .. أنا لأ
- حسن حسنين حسونة
- يا عالم نفسى اتسجن
- غراميات عفيفى

أشهر أدواره :

- عبد المتجلى سليط
- فهلا وفي برنامج ساعة لقلبك

أشهر إفيهاته :

- الله يخرب بيت الواد النشقى بتاع النشوق
- بنااات .. بابا
- قلبى بيغط منى
- على حساب صاحب المخل



ألو... مين معايا؟



- وحشتنا يا شيخ علام ووحشتنا أحلامك .
- ربنا يكفيكم شر أحلامى .. نه أنا أحلامى مهبية .. وكل ما أشوف حلم تحصل مصيبة .
- يا ساتر يا رب .. وآخر حلم شفته إيه ؟
- الله يخرب بيت الواد النشقى بتاع النشوق (إتشو) الواد غلط وحط لى فى النشوق شطة (إتشو) وفضلت أخرف وشفت اللهم اجعله خير إنى راكب قطر ورايح سينا وقال إيه طلعت عصابة سرقت الفلنكات وعجل القطر ورموا القطر فى البحر .
- اللهم احفظنا .. هالاه وبعدين .. القطر غرق يا سى علام ؟
- لا .. ما غرقش أصل أنا استعشت وقلت (بنات بابا) وجم بنات عبد المتجلى سليط (نبقه وعنبه وبلحه وبطيخه) وحذفوا لى مايوه وطوق نجاه وفضلت أعوم لغاية مالطه .

- يا سلام؟! أنت بتسرح بي زى (أبو لمعة) صديقك؟
- لا ما بسرحش ولا حاجة ده كان حلم (يا مغفل).
- وما فكرتش تمثّل هناك مسرحية (الأذان فى مالطة)؟
- أمال إيه .. مثلت وفضلت أنتع فى الأذان لغاية ما لقيت (قلبي بيفطّ منى) وفجأتني حصلت اشتباكات بين النشطاء الملط بتوع مالطه والناس الى مش ملط .
- كل ده فى الحلم؟ أنت باين عليك بتهجّص وبتقول ألغاز؟
- أنا لا بهجص ولا بقول ألغاز ده أنا (فهلاو) و(الحدق يفهم).
- طيب يا سى (فهلاو) إيه رأيك فى النور الى بيتقطع؟ والجنيه الى اتقطع حيله؟
- سييونى أمسك الوزارة وأنا أوريكم .. ده أنا (أشجع رجل فى العالم) ده أنا (عبود عبده عبود) ده أنا (أصل وصورة) ده أنا (شفيقة ومتولى) ده أنا ..
- كفاية بقى .. أنت بتتمرع علينا .. يعنى ها تعمل إيه؟
- إلاها اعمل إيه .. ها اوزع على كل مواطن (٢٠ فرخة وديك) وطبق (سد الحنك) وكمان مشروب (على خساب صاخب المخل) والعب مع البلطجية (جوزين وفرد) .

▪ وافرض الناس معجبهاش شكلك ولقيت (الدنيا مقلوبة) وهتفوا (يسقط حكم عبد المتجلى سليط) .

- في الحاله دى ما تأخذنيش ها اقول (بنات بابا) خدونى على (لوكاندة الفردوس) واتصلوا بصاحبى محمود المليجى قصدى (عباس أبو حجر) المحامى علشان يدافع عنى .

- ولو القاضى سالك أنت (سبع وللا ضيع) تقول إيه ؟

- أقول له (أنا آه .. أنا لا) أنا (حسن حسنين حسونة) اللى كان نفسه يعيشكم أحسن حسنين عيشة وكان نفسى أولع صوابعى شمع ينور للناس لما النور يتقطع كل شويه .

▪ طيب اتفضل ولع صوابعك كده وورينا .

- مش هاينفع أولعهم دلوقتى أصلى لسه مطفيهم من شويه (ها أو) وبعدين أنت هاتغلبنى معاك ليه ما تاخذنى اتفسح فى متتجع بورتو طره (يا عالم نفسى اتسجن) .

▪ بتكلم جد يا هنيدى ؟ ولا ده فيلم هندى ؟

- فيلم هندى ؟! أنت بتتريق على يا واد .. طيب والله (لأحلم لك حلم يجيب أجلك) .

▪ (حلمك يا شيخ علام) .. بالراحة شوية .

- عارف أنا حلمت بيايه ؟ حلمت إن أبو الهول اتسرق ولما

بتوع الأمن طلّعوا يطارّدوا الحراميه بالعربيات مالا قوش بنزين ولا سولار وبعدين الحراميه سرقوا سلاح بتوع الأمن واتضح أن أبو الهول جاله عقد عمل يشتغل بلطجي والواد (هول) ابن (أبو الهول) فاتح محل يبيع صكوك وكوبونات وبعدين الستارة نزلت والمسرحية باظت قصدي (حلم الثورة) باظ واتقلب (لكابوس) الله يخرّب بيتك يا واد يا نششقى يا بتاع النشوق (إتشو) .

▪ ده كلام خطير جدا .. أنا ها أبلغ النائب العام .

- لا لأ أبوس رجلك إوعى تدق على (تخاريفى) .. وتعالى نتفرج على (غراميات عفيفى) .. ده أنا (غلبان) .. ومش عاوز أروح (الفايكان) (*) .

(*) إشارة إلى د. مرسى رئيس الجمهورية السابق عندما أراد استبعاد المستشار / عبد المجيد محمود النائب العام السابق وذلك بتعيينه سفيراً لمصر في الفاتيكان.

حسن فايق

أبوضحكة ماركة مسجلة



1898-1980



أشهر أعماله :

- خطيب ماما
- الزوجة السابعة
- سكر هانم
- حسن ومرقص وكوهين
- لعبة الست
- أبو حلموس
- نشالة هانم
- العيش والملح

أشهر إفيهاته :

- ضحكته المميزة
- بتتوحم على رنجة
- تمام مزبوط
- بتقول إيه يا مغفل ؟



ألو... مين معايا؟



- يا ألف مرحب بالفنان الظريف اللطيف الخفيف حسن فايق .
- أنا مش حسن (فايق) .. أنا حسن (دايخ) ها أو (يضحك ضحكته المميزة)
- ودايخ ليه ؟ كفى الله الشر .
- دايخ من اللى بسمعه عنكم وعن أحوالكم .. أنا لو منكم كنت أقابل (خطيب ماما) واستعجله علشان يتجوزها وأخلص منها ..
- عارف مين (ماما) ؟ ماما الحكومة .
- مالها الحكومة ؟ ما هي زى الفل واتجوزت وزارة زى العسل والحمد لله بتتوحم على (رنجه) وبكره تخلف لنا (صكوك وكوبونات) والتعلب فات فات .
- وجبتم لماما الحكومة الرنجة اللى بتتوحم عليها وللا لسه ؟
- د. هشام قنديل رايح يشتري لها رنجة من (أثيوبيا) بس لقى

الرنجة غالية قوى واتلخم في موضوع (سد النهضة) ونسى يجيب الرنجة .

- لازم تجيوا (الرنجة) لماما الحكومة لاحسن تخلف لكم عيال بلطجية في قفاهم (بطارخ) .

▪ يقولوا إنك كنت بتغنى مونولوجات أيام ثورة ١٩١٩؟

- (تمام مزبوط) أنا كنت مونولوجست بريمو ومن أشهر مونولوجاتي : (شم الكوكايين .. خلانى مسكين) .

▪ طيب (ما تغنى علينا) قصدى (ما تغنى لنا) مونولوج عن أحوالنا دلوقت

- حاضر هاأوأو (ضحكته المميزة) من عيني خد عندك : (شم المولوتوف .. خلانى مهفوف .. م الاعتصامات والإضرابات .. ودنى اتطرشت ولا عدت بشوف) .

▪ يعنى لا تسمع ولا ترى ولا تتكلم؟!!

- بتقول إيه يا مغفل؟ هو فيه حد ما بيتكلمش دلوقت ده كل هايف بقى يتكلم وعامل نفسه ناشط وكل عيل بقى يتكلم وعامل نائر وكل عواطل بقى يتكلم فى الفضائيات .

▪ علشان كده المسئولين بقوا غرقانين ومش عارفين يعملوا

إيه؟

- (أيوه تمام تمام مزبوط) ربنا يكون في عونهم وأنتم برضه يا أخى لازم تعملوا حاجة وما تسيبوش (سكر هانم) تذوب كده على الفاضى .

▪ (سكر هانم) مين يا عم حسن ؟

- هو فيه (سكر هانم) غير مصر يا مغفل لازم تحافظوا عليها وتحموها من (حسن و مرقص وكوهين) .

▪ مين (حسن و مرقص وكوهين) ما توضح كلامك وبلاش أَلغاز ؟!

- مش عارف مين (حسن و مرقص وكوهين) يا جاهل ؟ طيب والله لأسلط عليكم (لعبة الست) واخليها تلاعبكم وتدوخكم وبعدين تزحلقكم على صلعتى .

▪ خيبة الله عليك .. ده أنت لاحسن ولا فايق ده أنت زيك زى أى مسئول مزحلقاتى .

- (أيوه تمام تمام مزبوط) ما أنا لازم أبقي (مزحلقاتى) طالما الناس ما بتشتغلش وكله عاوز ياخد وما حدش عاوز يدى .. ولازم يبقى فيه حلول غير تقليديه .

▪ زى إيه يا حسن أفندى ؟ ما تنورنا ينوبك ثواب .

- يعنى المسئول عن قطع الكهرباء (تكهربوووه) والمسئول

عن قطع الميه (تغرقووه) والمسنول عن نظافة الشوارع في الزبالة (ادفنووه) والمسنول عن غلاء الأسعار في الزيت المغلى (اغلووه) وافضحوا أى فاسد والعنوا أبوه والسح الدح امبوه إدى الواد لأبوه .

▪ أنت قلبت على أحمد عدويه ليه يا عم حسن فايق ؟ أنت باين عليك رايق .

- لا لأ مش تمام مش مزبوط أنا مش رايق أنا طهقنااا
ومتضايق .. سيبنى بقى أرمى نفسى فى التربة واخلص من قرفكم ..
أنت صحتنى ليه !!؟؟

▪ صحتك تشم هوا وتشوف أحفادك وتتفرج على الزمن .

- لا لأ ده مش زمنى أنا زمنى راح وانقضى وعندى ميعاد مع (أبو جاموس) يوه قصدى (أبو حلموس) علشان نقبض على (نشالة هانم) .

▪ طيب وحياء (العيش والملح) ماتنساش تسترد من نشالة هانم المليارات المنهوبة .

علي الكسار

بربري مصر الوحيد



1887-1957

أشهر أعماله :

- الأمير بابا ظ
- حزب المتليسين والمفلسين
- صحى النوم
- راحت السكره وجت الفكر،
- سلفنى ٣ جنيه
- رصاصة فى القلب
- على بابا والأربعين حرامى
- سرقوا الصندوق يا محمد
- حسن أبو على سرق المعزة

أشهر أدواره :

- عثمان عبد الباسط

أشهر إفيهاته :

- ده أنت مسيه (مصيبة)
- حنتين بتعريفة وحته بلاش
- ربنا يحزن عليك
- يا مغفل

ملحوظة :

- عندما قدم الريحانى مسرحية (قولوا له) ردّ عليه الكسار
بمسرحية (قلنا له)
- عندما قدم الريحانى مسرحية (كله من ده) ردّ عليه الكسار
بمسرحية (رن)
- عندما قدم الريحانى مسرحية (إش إش) ردّ عليه الكسار
بمسرحية (فلفل)
- عندما قدم الريحانى مسرحية (فُرجت) ردّ عليه الكسار
بمسرحية (راحت عليك)
- عندما قدم الريحانى مسرحية (الدنيا جرى فيها إيه) ردّ عليه
بمسرحية (الدنيا بخير)



آلو... مين معايا؟



▪ يا ترى مين الى طالبني الساعة دي؟! آلوه .

- إلهقني (إلحقني) يا وله يا موكوس بهته سلاه (بحة سلاح)
طبنجة وللا شومه وللا الى اسمه إيه شمروخ وللا إزازه مولوتوف
أدافع بيها عن نفسي .

▪ مين حضرتك يا أخ؟ وتتكم كده ليه؟ أنت بربرى وللا
إيه؟

- أيوه أنا بربرى مصر الوهيد (الوحيد) أنا عمك عثمان عبد
الباسط أنا على الكسار يا مغفل .

▪ أهلاً يا عم على (يا كسار) إحنا محتاجينك علشان (تكسر)
ضلوع البلطجية ودماع الكلمنجية الى بيهيجوا الرأى العام بكلام
ظاهره حق وباطنه باطل .

- يا سلام عليك يا وله .. ده أنت مسييه (مصيبه) يسلم بقك

- لكن ما قتلش أنت عاوز حته سلاح علشان إيه ؟
- أصلهم فتهوا (فتحوا) أنفاق في نفق شبرا الى جنب بيتي ويهربوا بلاوى سوده ويخطفوا الغلابه .
- ما تخافشى يا عم عبد الباسط وقول يا باسط .. أنا ها أخلى المسئولين يزودوا شوية في قطع النور والميه في حى شبرا ويخلوا المجارى تضرب في وش المهرين لغاية ما يطفشوا .
- طيب صلى على النبى ووهد (ووجد) الله وقول لى أخبار (الأمير بابا) وحزب المتليسين والمفلسين (إيه ؟
- ماخيش عليك كلهم مشغولين بسد النهضة بتاع اثيوبيا وربنا يستر .
- لو عاوزين (موضوع السد) ما يوصلش (لسكة سد) صلى على النبى ووهد (ووجد) الله وقل لهم ياخذوا هنتين (حتتين) بتعريفه وهته (حته) بلاش فوق البيعة يمكن ربنا يهنن (يحنن) قلبهم .
- (حتتين إيه) يا عم عبد الباسط ؟
- هنتين (حتتين) بسبوسة يا مغفل أنت نسيت (البسبوسة المبسوسة .. وفطائر طازه من العال .. دوق يا عريس دوقى يا عروسه .. وادعوا لى ولصاهب (صاحب) المال .
- وهم بتوع اثيوبيا لما ياكلوا البسبوسة ها يصرفوا نظر عن

موضوع السد .. أنت بتهرج ؟!

- البسبوسة (يا مغفل) يعنى كلام هلو (حلو) ومفاوضات ومعاهدات يا إما سييوني أكتر دماغهم بالعصايا بتاعتى وأقول لهم (كله من ده) .

▪ والله يا عم عثمان أنا ما أعرفش (الدنيا جرى فيها إيه) ؟

- (الدنيا بخير) بس (سلفنى ٣ جنيه) علشان أوفى النذر بتاعى وأجيب دستين شمع لأم هاشم بعد ما قبضوا على (كشكش بيه) فى قضايا قتل المتفرجين قصدى المتظاهرين وانطس هكم (حكم) وأنا هاسس (حاسس) كده (عقبال عندكم) إنها (فرجت) .

▪ (إش إش) صحيح (فرجت) وللا (راحت عليك) ؟

- راحت (راحت) على مين يا مغفل ؟ ده أنا رحت (راحت) المحكمة ومعايا (على بابا والأربعين حرامى) وقلت إلهق (إلحق) يا سيادة القاضى (حسن أبو على سرق المعزة) وعاوز فدية نص مليون جنيه علشان يسبب المعرة .

▪ وإيه دخل (كشكش بيه) فى الموضوع ؟

- ما هى قامت مظاهرة يا مغفل علشان المعزه .. والعجول قطعت الزريرة وعملوا اعتصام . وكشكش بيه قتل المتظاهرين والشاهد الوحيد كان (إسماعيل يس) .

- أنت نايم وبتهلوس يا عم عثمان (صحى النوم) !!
- إخرس يا وله جتك مسيبه (مصيبه) .. أنا قلت لا ولاد الهلال (الحلال) رو هوا (روحوا) لهشام قنديل و (قولوا له) ورهت (رحت) معاهم و (قلنا له) قال لنا (فلفل) ولما هذرتـه (حذرتـه) و قلت له (راحت السكره و جت الفكره) قال لى (رن) جيت (أرن) المهمول (المحمول) فصل شهن (شحن) .
- أنا حاسس يا عم عثمان إننا أخذنا (رصاصه فى القلب) و (الصناديق) اتنهبت و اتسرقت .
- لا اتنهبت ولا اتسرقت دول بس (سرقوا الصندوق يا محمد لكن مفتاحه معايا) والحمد لله (جت سليمه) وحظكم ماطلعشى (إسود زى وشى) تعال بقى اتفرج علىّ فى (شارع عماد الدين) .
- لأ بلاش (عماد الدين) و خلىنا فى (قمر الدين) علشان رمضان قربّ خلاص .

الضيف أحمد (*)

نجم ثلاثي أضواء المسرح



1936-1970

(*) نشرت بأخبار اليوم في ٢٩ يونيو ٢٠١٣ .

أشهر أعماله :

- طيخ الملائكة
- شنطة حمزة
- ٣٠ يوم في السجن
- أنا وهو وهى

أشهر مؤنولوجاته :

- جبرى مشوى جبرى طازه
- دكتور الحقنى
- كيوييد للبيع
- شالوا ألدو جابوا شاهين
- يا نورا يا نورا.. يا حلوه يا أموره



آلو... مين معايا؟



- آلوه الضيف أحمد؟ تسمح لنا (نستضيفك في الدنيا) .
- لا مانع أنا صحيح سبت الدنيا من سنة ١٩٧٠ لكن وحشتني الدنيا وقرها
- طيب أنت تبع (تمرد) ولا تبع (تجرد) ؟
- أنا تبع (تشرذ) يعنى الأخلاق المشردة الى مش لاقه نفسها في زمانكم .
- تحب تهدي إيه لفرقة (ثلاثي أضواء المذبح) الى ظهرت على المسرح ؟
- أحب أهدي لهم (جمبرى مشوى جمبرى طازه) جمبرى بطعم الثورة يغذى الشوار الحقيقيين ويجيب مغص للشوار الممثلين المزيفين .
- بمناسبة الجمبرى أنا نفسى أدوق (طبيخ الملايكة) .

- (طبيخ) الملايكة ده كان زمان .. دلوقت أنت عندكم (طبيخ الشياطين) .

■ والله عندك حق ده انا جالى تسمم من طبيخ الشياطين وعاوز دكتور يعالجنى .

- طيب ما تروح للدكتور هشام قنديل واوصف له الحالة وقول له : (دكتور الحقنى الفوضى جوه فى بطنى بتشلنى وبتخبطنى .. ومظاهره بتلخبطنى .. مش لاقى أهلى ووطنى) .

■ الله الله هى دى حالتى بالضبط برافو عليك . أنت تستاهل (شنطة حمزة) .

- يفتح الله يا عم مش عاوز (شنطة حمزة) ولا (شنطة البرادعى) أنا عاوز أمشى فى الشوارع وأغنى لناس (كيوييد للبيع) .

■ مش كيوييد ده برضه يبقى إله الحب فى الأساطير القديمة ؟

- أيوه هوه بعينه وأنا عاوز أبيع الحب علشان الناس يرجعوا يحبوا بعض زى زمان .

■ يقولوا إن جمال عبد الناصر كان بيعحب الاسكتش ده بتاع كيوييد للبيع .

- فكرتنى ده الرئيس عبد الناصر موصينى أحذرکم من (الصهيونية والإمبريالية العالمية) ويقول لكم خلوا بالکم دول

عينهم عليكم وعاوزين يقلبوكم .

▪ ما تخافشى علينا يا عم الضيف أحمد ده إحنا (الفسافيس) .

- ما أنا خايف عليكم يا فسافيس أحسن (مدحت الشماشرجى) ينصب عليكم بعد ما حرق (شنب النجعاوى) ومرمط كرامة هيبة الدولة وبعدين (المعلم رضا) يطيح فيكم وما تلاقوش (فريد شوقى) علشان يلم اللومنجية ويحبسهم (٣٠ يوم فى السجن) .

▪ عموماً أنا حاسس إنهم هايشيلوا الألاضيش يعنى المسئولين الخاييين ويجيبوا غيرهم .

- بس على الله ما تكونشى حركات على طريقة (شالوا ألدو جابوا شاهين .. ألدو قال للمعتصمين .. لولا أزمة البنزين .. وزحمة اللى متظاهرين .. كنت أولع فى الميادين) .

▪ وليه التشاؤم ده ؟ ما تيجى نغنى حاجة فيها تفاؤل ونقول لمصر (يا نورا يا نورا يا حلوه يا أموره) أو غنى لنا أنت اسكتش غنائى على كيفك .

- حاضر طرطق ودانك واسمع دى : (لو كانوا سألونا قبل ما يولدونا عارفين كنا نقول إيه .. كنا نقول اعتقونا واياك تخلفونا فى الزمن اللى انتم فيه) .

▪ مش ده الاسكتش الى كنت بتقول فيه (عاجبك يا بابا آدم .. عاجبك يا ماما حوا) .

- عليك نور يا قطموش .. بس بابا آدم وماما حواء رعلانين منكم قوى ويقولوا لكم عيب الى بتعملوه كفايه كده البلد خربت .. لكن قل لى بصراحه وبكل صراحه .

▪ هو فيه أحلى من الصراحه .. اتفضل اسأل وأنا أجابك بصراحه .

- بما أن بكره الأحد (٦/٣٠) (*) يا ترى إيه الى هياحصل؟؟

▪ ما عنديش إجابة بصراحه .. لأنى مصاب بحالة تناحه .. ومحاط بالبجاجة والوقاحة يا ريتك تسأل فؤاد المهندس وتقول له أعمل إيه (أنا وهو وهى) .

- فؤاد المهندس بيقول لكم إذا ما اتعدلتوش ومشيتم عدل ها اجيب لكم (النمساوى بيه وميمو انفتوة) يعلمكوكم الأدب .. يللا باى .

▪ باى إيه ؟ هاتمشى كده من غير ما تسلم على حبايبك ؟

- والله أنت ابن حلال ابقى سلم لى على (جورج سيدهم وسمير غانم) وربنا معاكم .

(*) المقصود بذلك يوم ٣٠ يونيه ٢٠١٣ وما أعقبه من أحداث .

عبد المنعم مدبولي

بابا عبده رائد المدبوليزم



1921-2006

أشهر أعماله :

- مولد يا دنيا
- أبنائي الأعزاء شكراً (مسلسل)
- برنامج ساعة لقلبك
- إحننا بتوع الأتوبيس
- مطرب العواطف
- جلفدان هانم
- مطار الحب
- السكرتير افنى
- ريا وسكينة
- راجل مفيش منه
- مدرسة المشاغبين
- فوازير جدو عبده زارع أرض
- البيجامة الحمراء
- فوازير جدو عبده راح مكتبته
- حسبه برما

- أصل وصورة
- حمار ماشلش حاجه
- نمره اتنين يكسب
- الحفيد
- سوق الحلاوة
- أشهر إفيهااته :
- والنبي هايجننوني
- طيب يا صبر طيب
- يرحم زمان وليالي زمان



ألو... مين معايا؟



■ إزيك يا بابا عبده والنبي وحشتنا .

- وأنتم كمان (وحشتوني) على رأى وردة بس ربنا يكون فى عونكم أنتم فى (مولد يا دنيا) وأخباركم بتضايقنى وتغمنى أنتم أكيد عاوزين تجتنونى (والنبي هاتجتنونى) .

■ حيث كده بيقولوا إنك (متهم) بتبديد احتياطى الكوميديا فى خزانة الدولة وتهريب الغاز المسيل للضحك إلى بلاد النكد ؟
- تبديد وتهريب ؟! (طيب يا صبر طيب) بقى ده جزائى بعد (٥٠) سنة من الضحك المتواصل .

■ ماهي أقوالك يا عم مدبولى فى التهمة المنسوبة إليك وهى التحريض على مليونية تطهير مصر من الكآبة ؟

- أيوه صحيح أنا نفسى أعمل المليونية دى فى ميدان (ساعة لقلبك) وأجمع (الفنانين المتحدين) وأغنى مع (مطرب العواطف)

وأطلع على (مطار الحب) .

▪ وكمان بتقر وتعترف يا بابا عبده إنك عاوز تروح مطار الحب وتُقلع على الخارج .

- أقلع على الخارج !! تبقوا عاوزين تقلعونى (والنبى هايقلعونى) !!

▪ ما تنساش إن عندك ملف فساد مع (ريا وسكينة) وملف تانى فى (مدرسة المشاغبين) وأبناؤك ضبطوك فى التحرير وأنت لابس (البلاك بلوك) قصدى (البيجامة الحمراء) .

- أبنائى ضبطونى !! طيب قول لهم (أبنائى الأعزاء شكراً) .

▪ بعض المسئولين يقولوا إنك السبب فى (عجز الموازنة) بين فرفشة المواطنين المساكين وعكثة الوزراء والمحافظين الفاشلين؟

- يبقوا أكيد عاوزين يسيحوا لى وينفضوا لى (والنبى هاينفضونى) علشان اقترحت على رئيس الوزراء رفع الحد الأدنى للغباء السياسى وإيجاد حل لمشكلة (حسبه برما) .

▪ مش عيب عليك تعمل كده يا بتاع (المدبوليزم) يا ابن الحاج مدبولى ؟ أنت فاكِر إن (إحنا بتوع الأتوبيس) ونسيت إن إحنا بتوع التوك توك وماعدناش بنخاف زى زمان .

- زمان !! (يرحم زمان وليالى زمان أيام ما كان الإنسان إنسان)

..أنتم فعلا لا بتخافوا ولا بتختشوا؟! فين (جلفدان هانم) فين (السكرتير الفني) فين (راجل مفيش منه)؟

■ بمناسبة إن رمضان على الأبواب عاوزين نسمع منك فزورة زى فوازيرك القديمة (جدو عبده زارع أرضه) و (جدو عبده راح مكتبته)؟

- خد عندك الفزورة دى : لو عزمك على وجبة إفطار مكونة من فول (الفلول) وزياى (التمرد) وعيش (العدالة) وكنافة (إنقاذ) مع شاي (البرادعى) .. يا ترى هاتحس بإيه؟

■ ها احس إنى بلا (أصل وصورة) وإنى (حمار ماشلش حاجه) وها اصرخ بعلو صوتى ها يضيعونى (والنبى ها يضيعونى) .

- عارف يا واد يا قطامش انا نفسى فى إيه؟ نفسى فى مليونية لتطهير الفن ومليونية لتطهير الفضائيات ومليونية لدعم الكوميديا وتخلوا سبيل برامج التوك شو من سراى المشاهدين .

■ ماشى يا جدو عبده إحنا موافقين وسوف نخلى سبيلك لكن مطلوب فدية للإفراج عنك .

- ما بلاش الفدية يا ابنى واخلونى أدخل السحب يمكن (نمرة اتنين يكسب) .

■ لا لازم فديه وإلا هانخطف (الحفيد) ونبيعه فى (سوق

الحلاوة) .

- طيب ممكن استعين بصديق واتصل (بفؤاد المهندس)
علشان يدفع الفدية ويعتقني منكم ومن الى عاوزين يهدلونى
(والنبى هايهدلونى) .

▪ ما تخافش يا بابا عبده الفدية بسيطة ضحكة صافية جميلة من
قلبك الأبيض النقى تبقى (مغناطيس) يجمع قلوب الناس على
الحب والخير زى زمان .

- ضحكة بس !! من عيني هاها هايضحكونى (والنبى
هايضحكونى)

لحد ما يسخسخسونى (والنبى هايسخسخسونى) ويمكن يموتونى
(والنبى هاييموتونى) هاهاها .

محمد عبد المطلب (*)

شيخ مشايخ الطرب الشعبي



1910-1980

(*) نشرت بأخبار اليوم في ١٣ يولييه ٢٠١٣ (الموافق ٤ رمضان ١٤٣٤هـ).

أشهر أغانيه :

- رمضاننا جانا
- يا حاسدين الناس
- الدبلتين والإسورة
- ما ييسألش على أبدا
- يا نايمة الليل وأنا صاحي
- الناس المغرمين
- ساكن في حى السيدة
- أهل المحبة
- ودع هواك
- بيع الهوى راح فين
- حبيتك وبحبك وها احبك على طول
- بتسألينى بحبك ليه
- اسأل مرة على

أشهر أعماله :

- الوردة البيضاء
- ابن حلال
- تاكسى حنطور
- ادينى عقلك
- على بابا والأربعين حرامى
- كذب فى كذب
- عفريت عم عبده
- كازينو اللطافه
- ٥ شارع الحبايب
- الصيت ولا الغنى

أشهر إفيهاته :

- دى ليله بيضا والنبي بيضا



آلو... مين معايا؟



■ أهلا ياسى عبد المطلب رمضان كريم .. أنا عاوز أهنيك على أغنية (رمضان جانا) اللى كل الناس بيعجوها وكل المطربين بيعسدوك عليها ؟

- يحسدونى ليه ؟ (يا حاسدين الناس مالكم ومال الناس) .

■ أنا جبت لك معايا (الطربوش) و (الورده البيضاء) هدية .

- طربوش وورده بيضاء ؟! يا زيتك كنت جبت لى صفيحة بنزين أحسن علشان أمون عربيتى .. أنت مش عارف إن عندى (تاكسى حنطور) .

■ بمناسبة رمضان والغلاء وارتفاع أسعار اليا ميش تحب تقول إيه لكل وزير ومسئول ؟

- أحب أقول لكل وزير ومسئول : (ما يسألش عليا أبداً .. ولا بتشوفوا عينيه أبداً .. يا ما ناديته واترجيته إنه يرق شويه أبداً) .

▪ يا راجل عيب عليك ده الوزراء والمستولين عينيهم طلعت
علشان يرضوا الناس ومفيش فايده .

- مفيش فايده ليه ؟ ده (الناس المغرمين) قصدى الناس
الطيبين (ما يعملوش كده) .

▪ والله يا (أبو نور) إحنا ما عدناش عارفين الناس المغرمين من
الناس الطيبين من الناس الشائرين والناس المعتصمين والناس
الناشطين والناس المضربين؟!

- طيب وفين (أهل المحبة) ما تقولوا لهم يدوكوا حبه و (بياع
الهوى راح فين)؟

▪ (أهل المحبة وبياع الهوى) واقفين فى الطابور وبيغنوا لمصر
(بتسألينى بحبك ليه) ؟ لكن مصر يا عيني عليها رھنت (الدبلتين
والإسورة) علشان تعمل مائدة الرحمن للشعب الغلبان .

- يا ساتر يا رب مصر رھنت (الدبلتين والإسورة) وأنا الى
ظلمتها وفضلت أقول لها (يا نايمه الليل وأنا صاحى) .

▪ والنبي يا عم طَلِّب وحياة ابنك نور تغنى لمصر وتدعى لها
وتقول (دى ليله بيضا والنبي بيضا) كل ما تزور (السيدة وسيدنا
الحسين) .

- بس أنا عزّلت من حى السيدة وخذت شقة إيجار جديد فى ٦

أكتوبر وحبيبي عزّل من الحسين وأخذ شقة في التجمع الخامس .

■ ويا ترى بعد حبيبك ما ساب الحسين لسه (يوماتى بتزوره مرتين) ؟

- أزور مين يا أخ ؟ ده أنا مره رحت أزوره طلع لى (على بابا والأربعين حرامى). وقطعوا الطريق الدائرى وخطفونى وقالوا لى (ودع هواك وانساه وانسانى عمر الأمان ماها يرجع تانى) .

■ بلاش تشاؤم عيب يا سى عبد المطلب ده انا (حبيتك وبحبك وها احبك على طول).

- أنت باين عليك (ابن حلال) بس (إدينى عقلك) إزاي اصدقكم وكل الى بشوفه واسمعه فى الفضائيات (كذب فى كذب) وقال إيه بيقولوا (عفريت عم عبده) هو الى معفرت البلد ؟!

■ بينى وبينك أنا شفت (عفريت عم عبده) فى (كازينو اللطافة) وخطف منى طبق الكنافه وكان عاوز بيعتنى أقابلك فى القرافه .

- الله عليك .. كلامك متغطّى وموزون وكله حكم بس فين (العجول) قصدى (العقول) الى تفهم لكن قل لى يا (جاموس) قصدى يا (قاموس) الفن والأدب هوه صحيح السبت الجاى هايتصلح حال الدنيا إن شاء الله ؟

■ سبت إيه ده (السبت فات و لحد فات وبعد بكره يوم الثلاث

ميعاد حبيبي) اللي باينّه مات !!

- مات ؟ البقيه في حياتكم (ودع هواك وانسأه وانساني عمر اللي
مات ما هاي رجع تاني) لكن قل لي وحياة والدك يا ابن قطايف هو
عنوان رئيس الوزراء إيه ؟

■ عنوانه (٥ شارع الحباب) عمارة (الصيت ولا الغنى) ليه يا
سى طليب ؟

- عاوز أبعث له فانوس هدية بيغنى (إسأل مره عليا قل لي
قساوتك ليه .. ده أنا أفديك بعينه واكثر منهم إيه) وما تنساش تسلم
لي على الأستاذ محمد عبد الوهاب .

سيد الملاح (*)

المونولوجست ملك السمسرية



1938-2005

(*) نشرت بأخبار اليوم في ٢٠ يولييه ٢٠١٣ (الموافق ١١ رمضان ١٤٣٤هـ).

أشهر أعماله :

- سيد مع حرمه في رمضان
- أبريق الشاي (أغنيه)
- العتبة جزاز والسلم نايلون (مونولوج)
- حفلات أضواء المدينة
- حفلات ليالى التليفزيون
- إضراب الشحاتين
- السمسمة

أشهر ما غنى (على السمسمة) :

- امشى محترما فى الشارع
- المتخاصم ويا أخيه
- للناس لسان يا ساده
- شكل المغرور المنفوخ



آلو... مين معايا؟



▪ رمضان كريم يا سيد يا ملاح .. أخبار برنامجك (سيد مع حرمه في رمضان) إيه ؟

- اسكت يا جدع بعيد عنك (مراتى) قصدى (حرمى) بقت ناشطة سياسية وعملت اعتصام وإضراب وبتطالب بالإفراج عنى من سجن الآخرة وهددت باقتحام السجن .

▪ والله فيها الخير ده احنا محتاجينك تضحكنا شوية وتغنى لنا (أبريق الشاي) بعد الفطار أو مونولوج (العتبة جراز والسلم نايلون).

- بلا عتبة بلا تحرير ما خلاص (أضواء المدينة) انظفت و(ليالى التلفزيون) بقت سوده ومليانه مذيعات ومذيعين بيعيطوا ويصوتوا ويلطموا .

▪ بقى جبتك يا عبد المعين تعنى ؟؟ لقيتك بتلطم بدل ما تغنى!!.. ما بلاش نكد وتدينا شوية تفاؤل .

- طيب خد عندك قرر المسئولون طرح كميات إضافية من
ياميش الفرفشة وإعادة هيكلة مكسرات الغلابة وقرر الجيش
الاستعانة بقوات مكافحة النكد .

■ الله الله جميل إديني كمان يا مرنولوجست يا فنان .

- قررت الوزارة تعويض المواطنين الى اتحرق دمهم في
طواير البنزين وتنظيم طواير ترفهية على البلاجات في المصايف
ووضع كتل خرسانية لمقاومة أمواج العكنة والقضاء على (إضراب
الشحاتين) .

■ ورأيك إيه في المصطلحات الآتية (الائتلاف) ، (المعارضة) ،
(انهيار البورصة) ؟

- يا سلام على الائتلاف .. ما يكون بطعم الخشاف .. ويا سلام
على كورة ماتش المعارضة .. لما تيجي تشوطها وتخبط في
العارضه .. ويا سلام على البورصة لو اتجوزت البورص بتاع الفلول
.. أصل البورصة عانس والبورص خلى بيها علشان كده انهارت .

■ طيب سيبك من السياسة وادخل على (السسمية) بتاعت
رمضان ودندن وقسم وقول حاجة للناس الى ماشية في الشارع .

- أقول على السسمية لكل واحد: إمشى محترماً في الشارع ..
كى تنجو من نقدى اللاذع .. فإشارع صورة للأمة .. ويرانا أجنب
في أزمة .. لو شافوا ناساً محترمه .. قالوا عنا شعبٌ رائع .. فامشى

محترماً في الشارع.

▪ طيب تقول إيه للناس اللي بتاكل في بعض وبتعادى بعض وبتخاصم بعض ؟

- خد عندك : المتخاصم ويا أخيه .. قل حين تراه إخيه .. صهين لأخيك إذا لخبط .. واصفح عن جارك لو يغلط .. وان شفت مواطن قم واشبط .. في رقبتة واحضن فيه .. ده المتخاصم ويا أخيه .. إخيه عليه إخيه .

▪ وتقول إيه للناس إلى بتولع في الدنيا بلسانها إلى متبرى منها ؟؟

- أقول لهم : للناس لسانٌ ياساده .. يجلب أحزاناً وسعاده .. ولسانك من لحمٍ أحمر .. يصبح أحياناً كالخنجر .. أو قنبلة قد تتفجر .. تقتل آلافاً وزياده .. للناس لسانٌ يا ساده .. بعض الألفاظ كأحجار .. بعض الألفاظ كأزهار .. لفظٌ يشبه ماء النار .. والآخر مثل الليموناده .. للناس لسانٌ يا ساده .

▪ وتقول إيه للمغرورين إلى ظهوروا على الساحة وفاكرين نفسهم حاجه عظيمة ما حصلتش ؟؟

- أقول لهم : شكل المغرور المنفوخ .. كالرنجة ذات البطروخ .. لا تتكبر لا تتقنعر .. فالمتواضع حلو المنظر .. والنفس الحلوة كالسكر .. أو كالتفاح أو الخوخ .. آه م المغرور المنفوخ .

▪ وأخيراً عاوزين قفلة حلوة نقولها على السمسمة للتجار الجشعين في رمضان.

• أقول لهم : الله الجبار القادر .. يحميني من جشع التاجر .. فالمال (حراماً) لا ينفع .. والطمع يضيع ما تجمع .. والمرء من الدنيا يطلع .. من غير فلوس في الآخر .. والحمد لجبار قادر .. يحميني من جشع التاجر .

▪ يسلم بقك يا عم سيد أنت مش (سيد الملاح) ده أنت (سيد تفاح) .

سيد مكاوي (*)

الوزير البصير مسحراتي مصر المحروسة!!!



1926-1997

(*) نشرت بأخبار اليوم في ٢٧ يولييه ٢٠١٣ الموافق (١٨ رمضان ١٤٣٤ هـ).

أشهر أعماله :

- المسحراتي
- ما تيلا يا مسعدة نروح السيدة
- الليلة الكبيرة
- ليلة امبارح ماجاليش نوم
- حلوين من يومنا والله
- الأرض بتكلم عربى
- وحياتك يا حبيبى ريح قلبى معاك
- آخر حلاوة
- يا حلاوة الدنيا يا حلاوة
- شنطة حمزة
- أول كلامى سلام

أشهر ألقابه :

- أنا هنا هنا يا ابن الحلال
- شعورى ناحيتك
- يا مسهرنى
- أوقاتى بتحلو
- قال إيه بيسألونى
- مش كتير على قلبى
- مبروك عليك يا معجبانى يا غالى



ألو... مين معايا؟



- إيه يا عم سيد يا مكاوى أنت لسه نايم ؟! ما تصحى .
- أنا مش نايم يا غسل أنا مغمض عيني بس شايف كل حاجة وعمال أسحر الناس وهمه مش دريانيين (اصحى يا نايم وخذ الدايم وقول نويت.. بكرة أن حييت.. الشهر الصايم.. والفجر قايم.. اصحى يا نايم وخذ الرزاق .. رمضان كريم) .
- الله الله وحشتنا يا عم سيد مكاوى يا مسحراتى وحشنا صوتك أنت فين وفين أراضيك ؟
- (أنا هنا يا ابن الحلال) .. لا عاوز جاه ولا كتر مال .. عاوز رجال .. رجال أبطال يحبوا بلدى ويفنوا معايا (حلوين من يومنا والله وبلدنا كويسة .. ونقول لكل وطنى عليك مليون مسأ) .
- أيوه كده لعلع ودندن كمان وكمان ده احنا محتاجينك تسحر مصر .

- حاضر من عيني (ده أنا صنعتي مسحراتي في البلد جوال ..
ياما عشقت النهار بس الليالي طوال .. مسحراتي منقراتي وأنا قلبي
راضى .. ماكنش فاضى .. وأنا قلبي رايق .. عايق وفايق).

▪ تعرف يا أبو السيد ان (شعوري ناحيتك شعور كبير وشعوري
بمحبتك .. مليون أحاسيس كثير).

- تشكر يا مجدد .. بس ليه ما عدتش بتكلمني ؟ وكأنني (ما
خطرتش على بالك يوم تسأل عنى .. وعينيه مجافيه النوم يا
مسهرنى)!

▪ معلش الأحوال كانت ملخبطة سامحنى و(خللى شوية علياً
وشوية عليك) وقل لى بتحب تقضى أوقاتك إزاي فى رمضان ؟

- بحب أقضى أوقاتي مع أولاد البلد الجدعان زيك كده أصل
(أوقاتي بتحلو معاك) وساعات أناذى البت مسعدة وأقول لها (ما
تيللا يا مسعدة نروح السيدة).

▪ نروح السيدة ليه ؟ عليك ندر دستين شمع لأم هاشم .

- شالله يا أم هاشم .. أنا عاوز أروح السيدة لأن (الرجل تدب
.. مطرح ما تحب .. وكل شبر وحتة من بلدى .. حتة من كبدى ..
حتة من موال .. ما تصحى يا نايم .. وتوحد الدايم).

وتعالى (نكنس السيدة) على الواد (رضا بوند) علشان يبطل

شقاوة ويسيب الناس في حالها .

▪ ماشى يا عم سيد بس على فكرة أنا (ليلة امبارح ماجاليش نوم) وقعدت أناديك وأقول لك (وحياتك يا حبيبى ریح قلبى معاك) وأنت مطنشنى ؟

- وتنادينى ليه ؟! ما أنا قاعد أهوه قدامك انت (أعمى) ؟ ده أنا يللى أعمى شفتك وشفت مصر وشفت حبايى وشفت حاجات حلوة كتير .

▪ حاجات حلوه زى إيه ما تقولى وتقول للناس أصلهم بيسألونى (قال إيه بيسألونى عنك يا نور عيونى) ؟

- طيب ما تصلى بينا على النبى .. أنا شفت يا سيدى (الأرض بتكلم عربى) .. أصل أنا (كلى مشاعر .. وماشى أشاور .. على البشائر .. أدق طبلى .. والمشى طاب لى .. مسحراتى منقراتى بقول: الأوله دى .. عيون ولادى .. تاريخ ميلادى .. تاريخ جديد .. والثانية ساير .. تحت المنابر .. أهنى أهلى .. بعيد سعيد) .

▪ أنت مش بس (شيخ الملحنين) ده أنت (آخر حلاوة) و (مش كتير على قلبى) انه يحبك .

- ربنا يجبر خاطرك يا أخ .. وبالمناسبة هات لى على السحور حتة حلاوة من ماركة (يا حلاوة الدنيا يا حلاوة) وهات لى (شنطة حمزة) الى مليانة ياميش وتعال نبدأ الكلام من الأول .

▪ نبدأ الكلام من الأول ونقول إيه ؟

- نقول (أول كلامى سلام) على أهالى بلدى الكرام (دى الليلة الكبيرة يا عمى والعالم كتيرة) .

▪ قصدك إيه (بالليلة الكبيرة) يا عم سيد ؟

- قصدى ليلة (فرح مصر) .. مصر هى العروسة والشعب هو العريس والزفة هاتكون فى ليلة القدر قبل صلاة الفجر وها أغنى للشعب يوم فرحه (مبروك عليك يا معجبانى يا غالى .. عروستك الحلوة قمر بيلالى) .. خلاص مصر والشعب هايعيشوا فى تبات ونبات ويخلفوا صبيان وبنات .. واللى جاي شربات .. واقرأ الفاتحة على اللى فات .

فؤاد المهندس (*)

مستر إكس أخطر رجل في العالم



1924-2006



(*) نشرت بأخبار اليوم في ٣ أغسطس ٢٠١٣ (الموافق ٢٥ رمضان ١٤٣٤ هـ).

أشهر أعماله :

- مسرحية سيدتى الجميلة
- فيلم اعترافات زوج
- فوازير عمرو فؤاد رايح يصطاد
- برنامج كلمتين وبس
- فيلم عائلة زيزى
- مسرحية روحية اتخطفت
- برنامج ساعة لقلبك
- مسرحية حواء الساعة ١٢
- فيلم شنبو فى المصيدة
- فيلم جناب السفير
- فيلم عودة أخطر رجل فى العالم
- مسرحية السكرتير الفنى
- فيلم خمسة باب
- مسرحية هالة حبيبتى
- فيلم أرض النفاق

- مسرحية علشان خاطر عيونك
- مسرحية أنا وهو وهى
- فيلم فيفا زلاطا
- فيلم العتبة جزاز
- فيلم خللى بالك من جيرانك
- مسرحية سك على بناتك
- مسرحية إنها حقاً عائلة محترمة
- مسرحية أنا فين وأنت فين



آلو... مين معايا؟



- كل عام وأنتم بخير .. رمضان كريم (يا عم فؤاد) .
- جاي تقول لي رمضان كريم بعد ما رمضان قرب يخلص وأنا مستنيك من أول رمضان تيجي تحاورني وماجيتش ؟!
- معلهش يا (عمو فؤاد) المواصلات زحمة للأخرة ولطريق الدائري على بعضه ولما قابلت (عم لا لو) قال لي (عمو فؤاد راح يصطاد) يا ميش ومكسرات وكحك وحلويات .
- بطل أونطة و(شغل ألاباندا) ماجيتش ليه تحاورني من أول رمضان ورحت لمحمد عبد المطلب .
- بصراحة خفت اقبالك وافتكرتك (اتجننت) أصل الصبوحه صباح قالت لي : (الراجل ده هايجنني .. طير مفاتيح عقلي مني .. ييجي رمضان وخناقه يزيد .. عاوز طباخة سكة حديد) .
- قول لها عيب عليكى يا صبوحه .. الكلام ده كان زمان لما

كنت شباب ولكن أنا كبرت وعندى السكر وصحتى مخسنة دلوقتى .

▪ طيب قولى يا عم فؤاد أنت اختفيت فىن ؟

- أنا ما اختفيتش أنا بس اتراهنت مع (حسب الله بعضشى) وكنت (رايح أجيب الديب من ديله .. بس لقيته من غير ديل) رحت طالع على (عائلة زيزى) .. أزورهم لقيتهم بيتخانقوا مع بعض قلت لازم اخترع (ماكينة) لإسعادهم تدخل لها (قطن الاختلاف) تديك (قماش الاختلاف) .

▪ برافو عليك .. يووه كنت هاتنسينى الست خيرية أحمد موصيانى أقول لك (محمود يا حبيبى) سيبك من (ساعة لقلبك) وخليك فى (ساعة لبطنك) علشان العيد على الأبواب ونفسها فى الكحك .

- قول لها (محمود يا حبيبى) بيقول لك إزاي يجيب لك كحك وهو مش لاقى شنبه وقعد يدور عليه فى (التحرير ورابعة العدوية) مش لاقيه وفى الآخر لقى (شنبو فى المصيدة) والفار بياكله .

▪ مش عيب (مستر إكس) يبقى شنبو فى المصيدة ويقعد يتفرج ويسيب الفار يأكله .

- والله يا أخى مستر إكس جاله اكتتاب واشترى عربية (خمسة باب) علشان يروح يقابل (سيدتى الجميلة) لكن للأسف تاه ولقى

نفسه في (أرض النفاق) .

▪ عاوز تفهمنى إن كلامك ده (اعترافات زوج) خاين علشان بيرر خيانتة وخييته؟!!

- اخرس يا ولد أنا عمرى ما خنت .. أنا قصدى أقول (كلمتين وبس) للى بيّفهموا لأن خير الكلام ما قل ودل وأنتم نازلين كلام ليل ونهار لغاية ما (روحية اتخطفت) لو كنتم سمعتم كلامى ما كنتم طلعت لكم (حواء الساعة ١٢)

▪ طيب بلاش كلام مغطى وقول لى يا (مستر اكس) وب (جناب السفير) وب (حضرة السكرتير الفنى) ليه رغم أنك خريج (كلية التجارة) بيقولوا أنك فؤاد (المهندس) !!؟

- المهندس ده لقب العيلة يا عبيط أنا أبويا العالم اللغوى د. زكى المهندس وأختى الإذاعية العملاقة صفية المهندس .. وبعدين ما أنت يا ابن قطامش أصلاً مهندس وماليكش دعوة بالهندسة وعمال تكتب فى الصحافة إشى حلمتيشى وإشى مقالات.

▪ أصل الصحافة بالنسبة لى تبقى (هالة جيبتى) زى الفن بالنسبة لك .. يااه الوقت بيجرى ومدفع الإفطار قرب يضرب .. تحب تقول إيه لمصر بمناسبة العيد؟

- أحب أقول لها (علشان خاطر عيونك) أنا مستحمل وعلشان خاطر عيونك ها أروح (انا وهو وهى) نجيب لك (فيفا زلاطا)

ترغزك وتعمل لك عتبة جديدة (عتبة جزاز) .

▪ وتحب تقول إيه لكل مصرى فى العيد ؟

- أحب أقول له (خللى بالك من جيرانك) وأهلك وناسك
(سك على بناتك) وأولادك يعنى حافظ عليهم وعلمهم الأدب
علشان العالم يقول عليكم (إنها حقاً عائلة محترمة جداً) .

▪ أخيراً تحب تقول إيه (لسيدتى الجميلة) شويكار ؟

- أحب أقول لها وحشتينى قوى بس (أنا فين وأنت فين) ربنا
معاك ويحفظك من شر زمانك وخللى بالك من (عودة أخطر رجل
فى العالم) .

أم كلثوم (*)

كوكب الشرق العظيمة على عظمة على عظمة ١١



1898-1975

(*) كان المفترض نشرها بأخبار اليوم في ١٠ أغسطس ٢٠١٣ (ثالث أيام العيد) ولكن لم تنشر.

من أغانيها :

- يا ليلة العيد آنستينا
- أنا في انتظارك
- لسه فاكر
- دليلي احتار
- ح اسيبك للزمن
- ثورة الشك
- قلى ولا تخيش يا زين
- أروح لمين
- الأطلال
- إسأل روحك
- فات الميعاد
- رق الحبيب
- مصر التى فى خاطرى
- سيرة الحب
- القلب يعشق كل جميل
- سهران لوحدى
- هوه صحيح الهوى غلاب

- ليلي ونهاري
- بعيد عنك
- أقول لك إيه عن الشوق
- مصر تتحدث عن نفسها
- على بلد المحبوب
- أقبل الليل
- جمال الدنيا يحلا
- يا صباح الخير يلى معانا
- طوف وشوف
- عوّدت عيني
- فكرونى

من أعمالها السينمائية :

- وداد
- عايذة
- فاطمة
- سلامة
- نشيد الأمل



ألو... مين معايا؟



▪ عيد سعيد (يا ست ثومة) (يا كوكب الشرق) (يا عظمة على عظمة على عظمة).

- أيوه يا اخويا أيوه خدني في دوكة أنت (لسه فاكر) نقول لي عيد سعيد النهارده؟

▪ طبعاً فاكر (كيف أنسى ذكرياتي) بس ملحق (النهاردة أجازة) بتاع أخبار اليوم ما بيطلعشى إلا يوم السبت ولولا كده كنت احتفلت بليلة العيد معاكي وغنيت لك (يا ليلة العيد آنستينا).

- أنت اللي آنستنا بس (ح اسبيك للزمن) لكن (قل لي ولا تخبيش يا زين) أحوالكم عاملة كده ليه؟

▪ مالها الأحوال يا ست ثومة؟! ما كله عال العال والناس بتأكل كحك ويسكوت ويبتى فور.

- كحكك وبسكوت !! طيب شوية سكوت وتعال نتأمل (الأطلال) ونأخذ عبرة من اللى فات بدل ما نندم بعد كده ونغنى (فات الميعاد) .

■ والله يا ست ثومة أنا شايف (مصر التى فى خاطرى وفى دمنى) لابسه طرحة بيضاء وسعيدة وبتوزع علينا الكحك وبتغنى (القلب يعشق كحك العيد) .

- (هوه صحيح) كحك العيد ده بفلوس المعونة؟ وللا (بعيد عنك) بدم الشهداء؟ وللا على حساب العجز فى ميزانية الدولة؟ جاوبنى بسرعة وما تسبنش (اتقلب على جمر النار) .

■ أجاوبك إزاي؟ وأنا (دليلي احتار) و (أكاد أشك فى نفسى) ومش عارف (أروح لمين)؟

- إن كنت مش عارف (اسأل روحك) مين اللى بيطلعن زهرنا بعد ما (رق الحبيب) ومين اللى بيتشقى فينا وعاوز يسمع (الآهات) ومين اللى عاوز يفكك مفاصل (سيرة الحب)؟

■ والله يا ثومة أنا (سهران لوحدى) وعمال أفكر (ليلي ونهارى) وأدعى ربنا (كل ليلة وكل يوم) إن (أمل حياتي) يتحقق وأشوف (وداد وعائدة وفاطمة وسلامة) رجعوا يغنوا (نشيد الأمل) .

- طيب ما تقول (للعراف) (*) عادل إمام يشوف لكم الطالع

وخللى محمد هيندى بحل لكم (فرازير مسلسلليكو) (*) وللا أقول لك بلاش أنا شفت الطالع وحليت الفوزرة وعرفت أن مصر بخير وهاتفصل بخير .. و (أقول لك إيه عن الخير يا حبيبي) .

▪ يسلم بقك يا عظمة على عظمة على عظمة أنت جبتي الخلاصة وعلى رأى حافظ بيه إبراهيم فى قصيدته الى غنتيها : (أنا إن قدر الإله مماتى .. لا تر الشرق يرفع الرأس بعدى) .

- طيب ما أنت ناصح أهوه أmaal بيقولوا عليك (قطايف) ليه ؟!

▪ أنا مش (قطايف) أنا (خايف) وكنت ناوى أروح (على بلد المحبوب) وأعمل اقتحام لأوكار الفتنة وأسد أنفاق المحنة وأهاجم العناصر الخبيثة لكن للأسف (أقبل الليل) فخفت من الضلمة .

- مفيش ضلمه ولا حاجه ده النصبح شقشق وخلا (جمال الدنيا يحلا) والناس بتغنى (يا صباح الخير يللى معانا .. الكروان غنى وصحانا) .

▪ بما إنك أكثر مطربة غنيت للحب (حب إيه) ، (الحب كده) ، (ليلة حب) ، (الحب كله) ، (ضلما الحب) شايفه إيه ؟ هو لسه فيه حب وللا (ضاع الحب ضاع ما بين عند قلب وقلب ضاع) ؟

(*) (العراف) و (مسلسليكو) من أشهر الأعمال التى عرضت فى التلفزيون وقتها.

- أنا شايفه إني اتبرع بالحلق بتاعى والعقد وفستانى ومنديلى للمجهود الشعبى يعنى كل واحد لازم يتبرع بحاجة علشان نعوض اللى فات إن شالله يتبرع بجزء من وقته ومجهوده .

▪ ينفع اتبرع بجزء من غباوتى يا ست ثومه ؟

- لا ما ينفعشى هو احنا ناقصين غباوه ؟! أنا عاوزه مصر ترجع زى زمان ونقول للزمان (ارجع يا زمان) ونقول لكل ضيف بيجى يزورنا (طوف بجنة ربنا فى بلادنا واتفرج وشوف) .

▪ يا سلام عليكى يا ثومه يا عظمه على عظمه .. وفى آخر حوارنا على طريقة برنامج على الناصية تحبى تسمعى أغنية إيه وتهديها لمين ؟

- أحب أسمع أغنية شادية (يا ام الصابرين) وأهديها لمصر (مصر التى فى خاطرى وفى دمنى) مصر اللى (عودت عينى على رؤياها) ونفسى كمان أهديها بوردة بس لو نسيت ابقوا (فكرونى) .

محمد رضا

ابن البلد الشهير بالمعلم رضا بوند



1921-1995

أشهر أعماله :

- ٣٠ يوم في السجن
- إضراب الشحاتين
- زقاق المدق
- مسلسل ساكن قصادي
- العتبة جزاز
- أنت اللي قتلت بابايا
- السلخانة
- شادر السمك
- عماشة في الأدغال
- الواد هملت المتردد

أشهر أدواره :

- جنجل أبو شفتوره
- المعلم رضه بوند

أشهر إفيهاته :

- عدم اللامؤاخذه
- يا ميت حلاوه على الناس الحلوه
- يا صلاة النبي أحسن
- ميت فل وعشرة
- المكتوب مفيش منه مهروب
- سقفة للنبي
- سمعنا الصلاتو على النبي
- هانبوس إمتى ؟
- طول ما تدوا ضهركم للترعة .. عمر البلهارسيا في جتكم ما ترعى .



آلو... مين معايا؟



- السلام عليكم يا معلم (رضا بوند) .
- حد أذنك ترمى السلام يا جعر .
- ليه الغلط من أولها كده يا معلم ؟! مش كفاية غلبتني معاك
- غلبتك ليه يا اخويا (عدم اللامؤاخذه)
- أول ما فتحت النت علشان أدور عليك نط لي (١٠٠) واحد اسمهم محمد رضا!!
- (يا ميت حلاوه على الناس الحلوه) الى اسمهم على إسمى إسم الله على مقامك .
- همه صحيح إسمهم على إسمك بس كلهم من بلاد فارس وإيران يا معلم .. زى محمد رضا بهلوى شاه إيران السابق ومحمد رضا كلزار الممثل ومحمد رضا الشيرازى الزعيم ومحمد رضا أحمدي الى مش عارف إيه !!

- (يا صلاة النبي أحسن) كل دولم محمد رضا (عدم اللامؤاخذه)؟

▪ لكن قل لي أنت رحت فين ؟ دوّرت عليك في كل الأحياء الشعبية مالقيتكش ؟

- أصلي كنت راكب طياره هليبوكر (قصده هليكوپتر) وعمال بدوّر على مصر ورحت (زقاق المدق) و (العتبة جزاز) حتى (السلخانة) و (شادر السمك) وسألت (عماشة في الأدغال) وقعدت أدور لحد ما قلبي اتخطف مني ومالقيتشى مصر !!

▪ ما تخافشى يا معلم مصر بخير بس أنت عارف إن (الأرض كروية وبتلف) ومصر بتلف معاها يعنى هاتأخذ لفه وترجع زى زمان وتبقى آخر نداشة يا عم عماشة عكاشة .

- يسمع من بقك ربنا وربنا يكفيكم شر الأمرا (الأمراض يعنى) أصل أنا بقص الكلا (الكلام يعنى) ونفسى أقص دماغ الى عمل كده في مصر وأخليه يمشى من غير دماغ .

▪ لكن مالك كده تخنت وبقلظت وكرشك كبير ووزنك بقى (١٠٠ رطل وزيادة) ؟

- أصل أنا قلبي أبيض زى البفتة البيضاء ونيتى بيضة زى اللبن الحليب وعلشان كده صحتى (آخر ألسطة وميت فل وعشرة) الدور والباقي على الى قلبهم أسود ونيتهم بعيد عنك زفتن وقطرانن (زفت

وقطران) .

▪ وتنصحنا بإيه يا (جنجل يا بو شفتورة) قصدى يا معلم رضا؟

- يا عم روح اتنيل .. بقى أنا اللي ها انصحكم ؟ وإيش تعمل النصيحة معاكم (ده المكتوب مفيش منه مهروب) .. طلع لى بقى بطاقتك (الشخصية) عدم اللامؤاخذه .

▪ ليه كده يا معلم مش عيب ؟ أنت فاكرنى إرهابى ؟ وللا شاكك فى حاجة ؟

- أيوه شاكك فيك وعاوز أعرف أنت اللي كنت (ساكن قصاى) وللا (أنت اللي قتلت بباي) واللأ أنت من (الكروديات) إلى عاملين فتوات ويدوبوا فى إيدى زى حطة الحلاوة .

▪ (يا نداشة عليك يا عكاشة) إخص عليك (يا رضا بوند) ده بدل ما تقول (سقفه للنبي) علشان ربنا يفرجها ويتعنا بالسلامه !

- بقول لك إيه ما تاخدنيش فى دوكة وتأكلنى الأونطة .. أنا شامم فى كلامك ريحة غباوه .. وشايف فى وشك تمرد وشقاوه تكونشى أنت (الواد همليت المتردد) بتاع (إضراب الشحاتين) .

▪ لأ طبعاً .. ده أنا (رضا بوند الى لبس البورنيطه وعمل هيصه وعمل زيطة) .

- أنت بتتريق علياً يا مجنو (يعنى يا مجنون) حيث كده لابد من كل بد أضربك بكرشى وآخد فيك (٣٠ يوم فى السجن) وألبسك (البردعه) يا عديم المجدعه .

▪ ربنا يسامحك وأنا كمان ها اسامحك لو قلت لى نصيحه من نصايحك العسل .

- طيب ما تسمعنا (الصلاتو على النبى) وخذ عندك : (طول ما تدوا ضهركم للخلافات والشعارات القرعه .. عمر البلهارسيا فى جتتكم ما ترعى) .. لازم تحبون بعض وتبوسون بعض .. هاهاه (هانبوس إمتى) ؟

▪ تبوس إيه ؟ ما تلم نفسك أنت فاكرنى شويكار فى (العتبه جزاز) !!

جماليات زايد

العانس الرغبة الخاطبة والزوجة النكدية



1919-1980



أشهر أعمالها :

- برنامج ساعة لقلبك
- مسلسل عيلة مرزوق أفندى
- حبابي كثير
- إحنا التلامذة
- طاقة الإخفاء
- بحبوح أفندى
- إسماعيل يس في الجيش
- بيت الطاعة
- المصرى أفندى

أشهر أدوارها :

- الرغبة (في ساعة لقلبك)
- أم بندق (في ساعة لقلبك)
- أم على (في عيلة مرزوق أفندى)
- العرافة (قارئة الطالع)
- المرضعة



آلو... مين معايا؟



- أهلاً أهلاً يا ست جمالات اتفضلى ادخلى خطوة عزيزة .
- إلهى يجعل دخلتى عليكم هديّة مهديّة وناديه منديّة وليله هنيّة ونصره قويّة .
- متشكرين على كلامك الجميل .. اتفضلى اقعدى .
- أقعد لك الهنا والمنى والتفاريح ، وسلّط على اللى يكرهوك الزوابع والريح ، وحفظك من شر التلاقيح ، وقعد على نفس عدوك الهم والغم ، والكابوس وطفح الدم و ...
- خلاص .. كفايه يا ست جمالات إنتى إيه بالعه راديو ؟!
- لا .. أنا بالعه (دش) وفيه شوية فضائيات واقفه فى زورى وعماله توش أصل أنا عقبال أملتك (رعاية) قد الدنيا رعاية بريمو رعاية برنامج (ساعة لقلبك) .

▪ أمال إسمك (جماليات زايد) ليه ؟

- أصلى (جمالى زايد) ، ونورى قايد ، ووشى حلو ، ومن مواليد برج الدلو ، و(حبائى كثير) فيهم الأمير والغفير بس يا عينى علياً مكتوب على جبينى إنى قليلة البخت !!

▪ ليه يا ست جمالات ؟ قصدى يا (أم على) هيه (عيلة مرزوق أفندى) جرى لها حاجة ؟

- يا حسرة على عيلة مرزوق أفندى .. حد كان يصدق إن العيلة المحترمة الأصيله دى تتبتر كده وتأكل فى بعضها ؟! وقال إيه (مرزوق أفندى وتفيده) عملوا حزب و (عديله ومحاسن وسامى) عملوا حزب ضدهم وهاتك يا كلام وإشاعات وضرب واتهامات وأبوك انسقامات ، وللا الواد (بندق) كمان ؟

▪ ماله بندق يا (أم بندق) كفى الله الشر ؟

- بندق ده خيبته مش على حد قال إيه عامل نفسه (ناشط) آخر نشاط يصحى الظهر ويجمع العيال بتوع حزب (إحنا التلامذة) ويلبس (طاقيه الإخفاء) ويعمل (اللهو الخفى) .

▪ والحل إيه يا ست جمالات ؟ نقول لعم (بجبوح أفندى) وللا تنادى لنا على (إسماعيل يس) ؟

- أنت ما تعرفش إن (إسماعيل يس في الجيش) وبحبوح أفندي محبوس في (بيت الطاعة) ومفيش غير حل واحد هو إني أفتح الكوتشينة واقرا لكم الطالع.

■ طالع وللا نازل مستنيه إيه ؟ ما تفتحي وأوعدك إني أجوزك الدكتور شديد علشان يستك وما تقضيش بقية حياتك (عانس) .

- عانس إيه ؟ تف من بقك ده كان زمان .. أنا دلوقت (زوجه نكدية) تخصص عكننة على كل واحد ما عندوش نخوة وشهامة ووطنية وكمان باشتغل (مرضعة) في أوقات فراغي علشان أرضع (الصغار) رجولة ومجدعة وكمان باشتغل (خاطبة) عند اللزوم .

■ طيب يا ست الخاطبة ما تفتحي الكوتشينة وتشوفي لي بختي يمكن معمول لي عمل وللا محطوط لي عقدة في المنشار ؟

- يحل عقدتك ؟ ويزهر دنيتك ، ويطلع البلا من جتتك ، ويسلك طريقك ، وبيل ريقك ، قادر يا كريم .. شوف يا سي موكوس أنا شايفاك في سكة سفر ، وراكب توك توك بالنفر ، وفي بيت العمدة ها تأكل زفر ، ويجوزوك بنت شيخ الغفر ، وبعدين هايعلبوا بيك زى الكورة الكفر !!

■ أنت بتخرفي وللا إيه يا أم بندق ؟!

- انا بخرف ؟! طيب والنبي لأجيب لك جوزى (المصرى أفندى) يربيك يا أفندى يا ناقص الربايه ، يللى وشك يطفش الغراب والحدايه .

▪ طيب كفايه وقومى هاتى لى جوزك (المصرى أفندى) ده أنا بدور عليه ومش لاقيه من ساعة ما تاه منى وسط البياعين المتجولين والحمير والزباله اللى فى شارع فؤاد وخايف يكون جرى له حاجه .

- فشر .. ده المصرى أفندى زى الفل غايته بس هو بعافيه وزهقان وطهقان .

▪ طيب ما تبخّريه بالشبه والفسوخة وعين الخريت ، من شر الشياطين والعفاريت .

- من عينى حاضر انا رايحه أبخره وأرقيه من كل شر وعلة ، وأحط فى عين الحسود فلة .

توفيق الدقن

الشرير البلطجي الحرامي المرح



1924-1988



أشهر أعماله :

- سكة السلامة
- ابن حميدو
- طاقة الإخفاء
- سعد اليتيم
- الجرايع
- انتهى الدرس يا غبي

أشهر إفيهاته :

- صلاة النبي أحسن
- أكووه يا أمم
- أكووه يا همبكة
- يا آه .. يا آه
- كله على ودنه
- آى والله
- أحلى من الشرف مفيش



آلو... مين معايا؟



▪ يا صباح الهنا عليك (يا أبو تيفة) . نهارنا أبيض وخالى من
البكش والأونطة.

- صباح الفل المشغول بأويه صباح الجمال أبو دلايات صباح
الزلاية القبرصى والهريسة الاسكوتش بالصودا يا إكسلانس
(صلاة النبى أحسن) .

▪ أَلَّا أَلَّا أنت فاكرانى (نعيمة عاكف) وللا إيه يا (عبده
دنس)؟!

- أَمال أنت تطلع مين يا اخويا ؟ (آلوه يا أمم .. آلوه يا
همبكة).

▪ آلوه يا دقن .. أنا الموكوس وبقى لى يومين بطلبك
وموبايلك مشغول !

- أصل حبايى كثير وبيكلمونى علشان يحجزوا عندى فى

مشروعى الجديد (سكة السلامة) .

▪ مشروع إيه ؟ أنت عملت مشروع فى الآخرة كمان ؟

- أmaal إيه (يا آه يا آه) أنا عملت شركة لبيع الأراضى الفضائية
ما تيجى تحجز حته فى كوكب المريخ جنب الحته بتاعت 'المرحوم
حسن فايق خبط لزق وعلى ناصية زحل .

▪ ليه أنت فاكرنى إسماعيل يس وعاوز تضحك على دقنى يا
دقن ؟!

- أنا برضه أضحك على دقنك ده أنا عاوز أنفّحك وتسقّع
الأرض وتبيعها بعد كده (لابن حميدو) وتكسب لك أرنيين حلوين
(يا آه يا آه) .

▪ والنبي إيه .. يا راجل عيب عليك مش كفايه النصب علينا فى
الدنيا عاوز كما تنصب علينا فى الآخرة !! .

- أنا نصاب ؟! ربنا يسامحك .. عموماً أنت الخسران ده
الطلبات عندى نازلة ورا بعضها (على ودنه) وبأكل لقمتى بعرق
جبينى .. (آى والله) .. (ده أحلى من الشرف مفيش) .

▪ طيب قول لى يا همبكة ما عندكش حل لمشكلة النور اللى
بيقطع عندنا كل شوية ؟

- (صلاة النبي أحسن) .. عندي الحل وشرفك (يا آه يا آه)
تعالى بس شرفني واشترى لك كام إزازة من (الكوبانية) بتاعتي ولا
يهمك بعد كده النور .

▪ كوبانية وإزازة .. إيه الحكاية ؟ أنا مش فاهم حاجة !!

- أصل أنا فاتح كوبانيه لتعبئة النور في أزايز (يا آه يا آه) وكل ما
النور يتقطع افتح لك (إزازة نور) تنور بيتك (يا إكسلانس) .

▪ على فكرة بقي أنت حاجة من اتنين يا إمّا نصاب عالمي يا إما
شغال مع (أبو لمعة) ؟

- عيب عليك .. (أى والله) عيب عليك ده أنا (عبده دنس) الى
بيفيد ويستفيد .

▪ طيب ياريت تفيدنى في موضوع الزبالة الى سودت عيشتنا .

- ستمعنى الأول الصلاة على النبي وقول (صلاة النبي أحسن)
وأنا أجيب لك عليه سحرية تحل مشكلة الزبالة واهو كله بحسابه
(وكله على ودنه) .

▪ علبة تحل مشكلة الزبالة .. إزاي ؟ ! .. هى العلبة دى فيها
إيه ؟

- (العلبة دى فيها فيل) والفيل لامواخذه يلم الزبالة بزلومته

(آى والله) بزلومته وبعد كده تلاقى البلد (صلاة النبى أحسن) مفيش كده .

▪ بقول لك إيه يا سى توفيق أنا قرفت من عيشتى ومتش عارف أعمل إيه ؟

- وإيه يعنى لما تقرف ده (أحى من القرف مفيش) .. اتكل بقى على الله وسينى .

▪ أسيبك ليه ؟ أنت رايح تزور (سعد اليتيم) وللا وراك حاجه ؟

- ورايا ميعاد مع (برلتى عبد الحميد) علشان تجيب لى (طاقة الإخفاء) الى ها سود بيه عيشة (الجرايع) الى بوظوا البلد .

▪ قصدك مين بالجرايع دول أبو تيفة ؟ ما توضح كلامك .

- أوضح إيه ؟؟ ما خلاص (انتهى الدرس يا غبى) آلوه يا امم آلوه يا همبكة (الخط اتقطع) .

أحمد الحداد

الشهير بأدوار الصعيدي والعرافة والرغاية



1928-1992

أشهر أعماله :

- شارع الحب
- معبودة الجماهير
- برنامج ساعة لقلبك

أشهر إفيهاته :

- بسرح بدبة
- ما طولشى عليك
- جطيعة (قطيعة)
- زعلان ومزعوط
- أبين زين أبين



آلوه... مين معايا؟



- آلوه مين معايا؟ الفنان أحمد الحداد؟
- بلا حداد بلا نجار (حط لسانك في خشمك) وسيني دلوكيت (دلوقت).
- بالراحة علىّ وقل لي أنا ماعدتش بشوفك ليه مع (فرقة حسب الله) في (شارع الحب).
- ما خلاص أنا سبت الشارع والفرجة (الفرقة) و (بسرّح بدبة) علشان أشحت عليها وألم جرشين (قرشين) أعيش بيهم.
- يا ساتر يا رب .. أنت حالتك بقت كرب كده؟!
- أيوه حالتى كرب من الغلا والبلا جطيعة (قطيعة) تجطع (تقطع) الفلوس وسيرة الفلوس.
- بس الى أعرفه إنك آخر نغنة وأشيئت معدن؟!

- ما أنا عجبال (عقبال) أملتك أفكرت نفسى (برص)
وضاربت فى (البورصة) واشتريت ألف سهم فى مصنع (البلايص)
وألفين سهم فى شركة الجفف والمجاطف (القفف والمقاطف) .

▪ عال عال وكسبت كام مقطف قصدى كام (باكو) ؟

- كسبت باكو شاي وياكو معسل ومرتى (مراتى) ركبها ٦٠٠
عفريت وجالت لى (قالت لى) أنت وشك يجطع (يقطع) اخميرة
من البيت .

▪ علشان كده بقى أنت زعلان ومزعوط ؟

- لع (لا) أنا مازعلشى ولا حد يجدر (يقدر) يزعطنى .

▪ أمال الدنيا (مدعسة كحل) فى خلقتك ليه ؟!

- أصل مرتى (مراتى) بنت (عبد اللاوى بوزه أفندى) عملت
عملة سودة ودابت لى (جابت لى) حواوشى معمول بلحمة كلاب
وجطط (قطط) أكلته من هنا ورجعت (رقت) بالصوت الحيانى
وجعدت (قعدت) أهوهو وأنونو خدينى يا وليه على (المستشفى) .

▪ قصدك تقول (المستشفى) ؟

- لع يا داهل (لا يا جاهل) دى اسمها (مش تشفى) .. ما
طولش عليك جالوالى (قالوالى) بطنك (مغوظة) ومصارينك

(مِلْفَلْفَة) وفيها ٣ فيران ييجروا من (الجطط) .

▪ وعملوا لك غسيل معدة يا ترى ؟

- لع (لا) يا أبوى .. مرتى (مراتى) راسها وميت صرمة تطلع معدتى وتحطها فى الطشت وتغسلها هيه وتاخذها فمين على إيديها .

▪ يا وقعة سودة !! وعملت إيه يا فيتك ؟

- عملت زى المرحوم أبويا وشربت شوية (رابسو) غسلوا بطنى وبجيت (بقيت) زى الفل .

▪ يا سلام على نباهتك .. ليها حق (معبودة الجماهير) تشغلك معاها .

- آمال يا ددع (جدع) ده أنا حدج (حدق) وبجرا (بقراً) الطالع كمان و (أبين زين أبين) .. خد وشوش الدكر وارمى بياضك علشان أجول لك (أقول لك) بختك .

▪ اتفضل يا سيدى أدينى (رمىت بياضى) عشر (بيضات) بعشرة جنيه .

- مكتوب على دينك (جيبك) إن البلاوى مستنياك ، وأمنا الغوله مستجصداك (مستقصداك) ، ها تجطع (تقطع) عنك الميه والكهربا ، وتخلي عيشتك مهبية ، وتسלט عليك الغلا ، وتخلي

حياتك بالبلا ، ولأنك من أصحاب الدخل المحدود ، فطريجك (طريقك) مسدود مسدود ، الزبالة محوطاك ، والبؤس وراك وراك .. يا ولدي والحل زى ما جال (قال) عب الحليم (عبد الحليم) بيع جلبك (قلبك) بيع كرشك شوف الشارى مين .

■ منك لله بقى بدل ما تضحكنى تنكد على ؟! مع السلامة .. أنا هاقل السكة .

- إجفل (اقفل) يا بوى بس أوعى تجفلها (تقفلها) على ديل الدلاية (الجلابية) .

بتجارة وكيم (*)

أشهر من قام بأدوار الشخصية الشامية



1889-1949

(*) نشرت بأخبار اليوم في ٢٦ أبريل ٢٠١٤ بمناسبة (شم النسيم).

أشهر أعماله :

- غرام وانتقام
- قلبى دليلى
- الدنيا جرى فيها إيه
- الدنيا على كف عفريت
- الدنيا لما تضحك
- تحيا الستات
- لعبة الست
- لو كنت غنى
- ليلي بنت الأغنياء

أشهر إفيهاته :

- العمى فى قلبك
- مخى بيهق بيلق عايم فى بالوظه
- داهيه تقطعك وتقطع وشك
- حدارجه بدارجه من كل عين دارجه



آلو... مين معايا؟



- صباح القشطة يا عم بشارة .. صباح البيض الملون والفسيح والملوحة والبصل .
- العمى فى قلبك .. شو فسيخ ويصل ؟! .. وحياة الله لأقصف عمرك قصف .
- طيب حقك علىّ (يا بُش بُش) .. أنا كنت عاوز بس أعمل معاك حوار فى شم النسيم .
- إن كان هايدى إالى بتريده يبقى (صباح البوظة) صباح الدندورمة (تسلم لى عويناتك) .
- أنت هابتدى من أولها ترطن معايا بالشامى وللا إيه ؟!
- يا جناب المبجل أنت ما بتعرف إننى أصلى لبنانى من (زحلة) .
- آآه علشان كده كنت دكتور الأمراض المستعصية (زحلاوى ابن زحلاوية) فى فيلم (غرام وانتقام) .

- يا دِلِّي يا دِلِّي على الزكاوة . لكن قل لي يا أزعري ألعوط شو
إسم جنابك ؟

▪ محسوبك (بلاليكا) كنت جارك في شارع شبرا وزميلك في
مدرسة الخرنفش وفرقة رمسيس فاكر (بلاليكا) ؟؟؟ وللا مش
فاكر؟؟

- (بلا) شو .. العمى في قلبك .. شو بيسوي عنديكو في مصر
أنا قلبي راح ينفشخ فشخ وحياة الله مني فهمان حاجة من اللي
بيحصل عنديكو .

▪ سيك من اللي بيحصل عندنا وسيك من الدنيا وقل لي عامل
إيه في الآخرة ؟

- وكيف عرفت إني هون في الآخرة ؟!

▪ أصل أنا (قلبي دليلي) والحمد لله إنك سبت الدنيا وارتحت
منها ومن قرفها وبعدين سيك بقى من اللهجة الشامية دي وكلمني
عربي .

- طيب اتلقح بقى وقل لي (الدنيا جرى فيها إيه) وليه بقت
(الدنيا على كف عفريت) .

▪ أيوه كده كلمني مصري الله ينور عليك وضحكني شويه ده انا
من زمان نفسي أضحك ونفسي أشوف (الدنيا لما تضحك) .

- طيب ما تيجى نزور (الغندورة) منيرة المهدية ونسمع (يا ليلة بيضا يا نهار سلطاني) وتسلطن وناكل فسيخ وبصل ونغنى (إضحك كر كر إوعى تفكر حلوه الدنيا زى السكر) .

■ ومين ليه نفس يغنى ؟! ما تشوف لنا حل فى اللى إحنا فيه ده يا سى بشاره أحسن أنا خلاص (مخى بيهق ويبلق وعاييم فى بالوظه) .

- ما تحمد ربنا إنك عاييم فى بالوظه يا (بلاليكا) وإن ماكنشى عاجبك أجيب لك (بحبح وجحا والشيخ ينسون ودرويش بيه أبو المعاطى) يضربوك بالصرمة .

■ ما هى البالوظه طلعت بايظة وحمضانة وخسرانة وجبت لى مغص بعيد عنك وكل ما أشوفك فى أدوارك المشهورة اللى قلت عليها ألاقى نفسى بقول (تحيا الستات) .

- (أيوه كده) عليك نور أصل الدنيا دى عامله زى (لعبة الست) وأنت مش قدها و (لو كنت غنى) قصدى لو كنت ذكى طلق الهم بالتلاتة .. (لا) طلقه بالأربعة (بالحنفى والمالكى والشافعى والحنبل) !!

■ تعرف إنى ارتحت لما شفت وشك .

- وأنا اتعكنت لما شفت وشك .. هوه فيه حاجه جايه لنا الكافيه إلا وشك (داهيه تقطعك وتقطع وشك) .

■ ليه بس كده يا عم بشاره ماكننا حلوين؟؟؟

- ولا حلوين ولا حاجه ده أنتم عاوزين حد يبخركم ويرقيكم ويقول لكم (حد رجه بدارجه من كل عين دارجه) وعاوزين كمان (محروس المزين) يعمل لكم خلع اسنان وطهاره إجبارى علشان ترجعوا تحبوا بعض زى زمان .

■ طيب كفاية كده .. الحوار خلص .. وعزرائيل ببسأل عليك .

- عزرائيل لما يخذ خبرك .. العمى فى قلبك .. العمى فى عينك يا أزعري ألعوط .

نجوى سالم

دلوعة فرقة نجيب الريحاني



1925-1987



أشهر أعمالها :

- موزة و ٣ سكاكين
- إلا خمسة
- لو كنت حليوة
- حركة ترقيات
- ياما كان في نفسي
- استنى بختك
- الستات ما يعرفوش يكذبوا
- ٣٠ يوم في السجن
- حسن ومرقص وكوهين
- البيجامة الحمراء
- لو كانددة الفردوس
- أصل وصورة

أشهر إفيهااتها :

- ضحكاتها المميزة
- يا مضروب

- جتك ضربة في قلبك
- يا خراشى
- يا ننوس عين ماما
- يا بلبل
- جتك زقيقة (جتك زقة)
- ما يحكمشى
- ما اقدرش على كده أبدا



آلو... مين معايا؟



- إزيك يا نجوى (يا نوجه) يا أحلى من النوجة .. وحشتيني موت
- وأنت كمان وحشتني موت (يا مضرووب)
- بجد وحشتك ده أحسن خبر سمعته أصل أنا من ساعة ما كنت طفل صغير وشفتك فى مسرحية (موزة و ٣ سكاكين) مع خالى الفنان مظهر أبو النجا وقلبي بقى زى الموزة والسكاكين بتقطع فيه .
- (يا حرام) السكاكين بتقطع فيك ليه ؟
- أصلى مشتاق لك وعاوز أشوفك من ساعة ما مِتِ ورحت الآخرة .
- أنا مت ؟! جتك ستين موة .. (جتك ضربة فى قلبك) .
- حقك علىّ يا نوجة .. ما تزعلش واديني بوسة .
- بتقول بوسة !! عيب اختشى يا راجل .. أنت عاوز تتحرش

بى يا متحرش والله لأصوت وأجيب لك (مارى منيب وزينات صدقى وجماليات زايد) يتحرشوا بىك (يا لهووى) .

▪ وطى صوتك بلاش فضايح أنا قصدى أبوس راسك بس .

▪ تبوس راسى ؟! أنا ما قدرشى على كده أبداااا .. (لو كنت حليوة) كنت بُستك .

▪ تعرفى يا نوجه إن أنا (يا ما كان فى نفسى) أقابلك وكنت عاوز أجيلك فى مسرح (الريحانى) بس الميه كانت مقطوعة وما عرفتش استحمى واحلق ذقنى وأجيلك على نظافة .

- (يا خراشى) عليك يا ننوس عينى .. خش فى عبي يا واد خش .. الميه مقطوعه يا كداب .

▪ آى والله الميه مقطوعه أنا مش كداب وانتِ عارفه إن (الرجاله ما يعرفوش يكذبوا) .

- نعم نعم نعم .. اسم الله عليك .. الرجالة ما يعرفوش يكذبوا وللا قصدك (الستات ما يعرفوش يكذبوا) ؟؟

▪ ما علينا يا نوجه ... الميه جت واستحميت وحلقت ذقنى وركبت مترو الأنفاق ونزلت محطة جمال عبد الناصر وقلت أتمشى لغاية مسرح الريحانى فى شارع عماد الدين وبعدين ..

- وبعدين إيه (يا حلوة) قبضوا عليك (اشتباه وتحرى)

وحبسوك (٣٠ يوم في السجن) .

■ لا لأربنا ستر ما حصلش بس النور اتقطع ومشيت أحسس ولقيت نفسى وسط البياعين المتجولين الى يسدوا عين الشمس فى شارع فؤاد وبعدين ..

■ وبعدين يا روح ماما تهت فى السكة مش كده ؟؟ (هاهاها ما يحكمشى) !!

■ لا ما تهتش بس لقيت (حسن ومرقص وكوهين) مع البياعين المتجولين ويبيعوا ملابس وهدايا واكسسوارات حريمى شفايف منفوخة وشعر مستعار .. قلت أجيب لك هدية

■ متشكرة قوى يا حبّوب .. أنا لا عاوزه شعر غيره .. ولا شفايف منفوخة ولا سليكون .. أنا جميلة كده جمال طبيعى .

■ مش القصد .. انا قلت أشتري لك (البيجامة الحمراء) وإزاحة برفان بس ضحكوا على ولزقوا لى بصايع كلها صينى ومضروبة .

■ بص بقى (يا بلبل) أنت تيجى لى (لوكاندة الفردوس) علشان أخلى (الشيخة مستكة) تعمل لك عمل من (أصل وصورة) يحفظك من شر أولاد الحرام والأسياذ ترضى عنك .

■ مش لوكاندة الفردوس دى فى شارع الفوضى والانفلات المتفرع من ميدان العتبة حتى بالأماره جنب اللوكاندة ٣ عمارات

مبنية مخالف بدون تراخيص.

- برافو عليك يا خلبوص .. وبدل ما تيحي وتتعب نفسك ويشيلوك بالونش ها اديك الوصفة بتاعت (عقيلة راتب) الى هاتحل لك مشاكلك .. أنت تروح ميدان رمسيس الساعة خمسة (إلا خمسة) وتلف الميدان خمس مرات بوشك و ٥ مرات بضهرك وتشحت (الحد الأدنى للمرتب) وترمي نصه في الفسقية والنص الثاني تحطه في إيد رمسيس .. وبعد كده .

▪ وبعد كده الحظ يزقني وادخل (حركة ترقيات) مش كده جتك زقة ؟

- يزقك إيه ؟ أنت بتريق على يا منيل على عينك (جتك زُقيقة) يا فقرى خليك قاعد كده زى خيبتها و (استنى بختك) مع السلامة .

إستيفان روستي
الشرير النذل الانتهازي الظريف



1891-1964



أشهر أعماله :

- عفرية هانم
- ما تقولش لحد
- غزل البنات
- بنت البلد
- معلش يا زهر
- سيدة القصر
- شاطئ الغرام
- قطار الليل
- سلامة في خير

أشهر أدواره :

- دنجل ، الحنش ، أبو العز ، زكى بَشْكُها

أشهر إفيهااته :

- أنت مش قد زكى بَشْكُها
- لآخر لحظه أدینی ویاك
- مش عاوزین شوشرة في لمطرح

- بالشلوت
- يا حلاوة المفاجآت
- عاوز أفرح عاوز أهني
- تسمحي لي بالرقصه دي
- ها اروح أتخزم وأجى لك
- نشنت يا فالح
- خد سيف



ألو... مين معايا؟



- مرحب يا (دنجل) يا ألف مرحب (بالحنش وأبو العز) (وزكى بَشْكها) بتاع فيلم (المليونير).
- بقول لك إيه ؟ (أنت مش قد زكى بَشْكها) خش في الموضوع (مش عاوزين شوشرة في المطرح ده محل محترم).
- سمعت إن الممثلين والمشخصاتية عاملين إضراب ومش عاوزين يمثلوا ويضحكوا الناس علشان (نجيب الريحاني) مارضيش (يرفع الكادر) بتاعهم ؟!
- إضراب إيه ؟ دول وش فقر وما عندهم مش رحمه تصدق يا محترم إن واحد من الجمهور جت له غيبوبة نكد بعيد عنك وأغمى عليه لما عرف إن أسعار الغاز والبنزين والميه والكهرباء هاتغلى ورغم كده استمروا في الإضراب ورفضوا يضحكوه ويزغزغوه علشان يفوقوه.
- وأنت كان موقفك إيه يا سى إستيفان يا جنتلمان ؟
- أنا رفضت الإضراب وقلت للريحاني (لآخر لحظه أدينى وياك .. لما نشوف آخرتها معاك).

- برافو عليك .. أmaal يقولوا إنك اشتهرت بأدوار (النذل والانتهازي والمنافق) ليه ؟!.
- بيغيروا منى يا حضرة .. أنا صحيح شرير بس (شرير ظريف) برقص على كل الحبال واتفاهم مع العفاريت حتى اسأل (عفريته هانم) .
- وياترى (الريحانى) اتبسط منك وادى لك (غزل البنات) ؟
- لأ إدانى (بالشلتوت) فاهم بالشلتوت .. وبعدين رجع وصالحنى وقال لى (معلش يا زهر) .
- بس أنا عرفت إنه بعث لك هدية إنما إيه مفاجأة ؟
- (يا حلاوة المفاجآت) .. عاوز الصراحة هو بعث لى (سيدة القصر) الست فاتن حمامة ومعاها دعوة لفندق (شاطئ الغرام) مع حسين صدقى ولىلى مراد وكماتن تذكرة مجانية فى (قطار الليل) وموبايل هدية مع الست سامية جمال .
- يا حلاوة .. (على رأى مظهر أبو النجا) .. أكيد موبايل تاتش من أحدث موديل .
- لأ وشرفك ده طلع موبايل مفخخ وفرقع فى وشى .
- يا ساتر استر يا رب .. وجرى لوش حضرتك حاجه ؟
- جت سليمة بفضل ربنا و (سلامة فى خير) وخير فى سلامة اقول لك خبر يفرحك بس (ما تقولش لحد) .
- ياريت (أنا عاوز أفرح عاوز أهنى .. وعاوز أرقص وأغنى) .
- جالى طلب صداقة على الفيس بوك من (بنت البلد) وقالت لى

أنا ملكة جمال إمبابة وجابت لى عقد عمل فى القناة القضائية بتاعتها
علشان اعمل لها برنامج توك شو مع هيفاء وهبى .

▪ مع هيفاء وهبى !! يا بختك يا عم .. وأكيد كمان هتقبض على
قلبك (قد كده)؟

- أقبض إيه ؟ وأنيل إيه ؟ هو أنا وش ذلك .. ده أنا رحت
قابلتها على واحدة ونص وقلت لها (تسمحي لى بالرقصة دى) ..
قالت طيب (هااروح اتحزم وآجى لك) مع هيفاء .

▪ جميل قوى .. (نشنت يا فالج) على هيفاء وملكة جمال إمبابة .
- لا ما لحقتش أنشن لأنهم جابوا معاهم واحد مليونير من بتوع
غسيل الأموال ولعبونى (بوكر) .

▪ وأنت (حريف بوكر) وأكيد (نشنت يا فالج) وكسبتهم
وخربت بيتهم .

- كسبت مين؟ ده هم اللى قعدوا يقولوا لى (خد سيف يا زكى
بشكها خد سيف خد سيف) لحد ما أخذوا كل اللى فى جيوبى
وبعدين لعبت على هدومى فكسبوها وخلونى زلط ملط .

▪ يعنى ما عرفتش تنشن يا فالج !؟

- لا وحياة راس والدك وفى الآخر رحت أشحت قدام (سينما
مترو بول وسينما ستوديو مصر) علشان أجيب ثمن التذكرة وأسافر
للأخرة تانى وارتاح من وشكم العكر .. ده وش إسماعيل يس
المشلفط أرحم من وشكم !!!

أبو بكر عزت

مفتش عام الكوميديا والمرح



1933-2006



أشهر أعماله :

- المفتش العام
- عصفور في القفص
- المرأة والساطور
- شيلنى وأشيلك
- الدبور
- الدخول بالملابس الرسمية
- ٣٠ يوم فى السجن
- كلاب الحراسة
- سنة مع الشغل اللذيد
- الاحتياط واجب
- حركات ترقيات
- البيجامة الحمراء
- على جناح التبريزى وتابعه قفة
- على الزبيق

أشهر إفيهاته :

- برئ والنبي يا بيه
- ألد ألد ألد
- مصراني الأعور بينقح عليًا
- الهيلوقفة
- مش عاوز كوستلته
- خليني كفته أحسن



آلو... مين معايا؟



- كنت فين يا حضرة (المفتش العام)؟ يا مبصصاتى يا أبو عين زايغة؟ مش خايف من (لمرة والساطور)!!؟
- (برئ والنبي يا بيه) حتى اسأل فريد شوقى ومحمد رضا يقولوا لك إنى لسه خارج دلوقتى .
- خارج دلوقتى منين؟ قر واعترف (يا دبور) يا منحرف .
- خارج من (٣٠ يوم فى السجن) .
- بمناسبة (٣٠ يوم فى السجن) أنت (حرق شنب النجعاوى ليه؟ يا مدحت يا شماشرجى) .
- ماكنشى قصدى والنبي يا عم بس الحكاية إن النور كان مقطوع وما شفتش النجعاوى ويدل ما أولع الشمعة ولعت فى شنبه .
- طيب ابقى قول الكلام ده فى المحكمة حكما عليك (بسنة مع الشغل اللذيذ) .
- أموت أنا فى الشغل اللذيذ وحبذا لو أكون مستشار فى (حركة ترقيات) وأقبض نص مليون .

- يا سلام عليك هو ده بقى الشغل اللذيذ؟!
- آمال يا حضرة الفاضل .. ويكون (ألد ألد ألد) لو اتحبست فى المستشفى أصل (المصران الأعور بينقح عليًا) وعاوز علاج على نفقة الدولة .
- علاج على نفقة الدولة ؟ وللا عاوز تتحبس فى المستشفى علشان ليلى طاهر تعالجك (يا دبور) .. بس هاتروح فى من إبراهيم سعفان .. ده مش هايسبك ده (هايضحضحك) .
- أَلَا أَلَا .. أنت هرشتنى بسرعه كده .. طيب بلاش المستشفى إحبنى يا سيدى فى طره ولبسُونى (البيجامة الحمراء) وهاتوا لى نجوى سالم .
- يعنى مفيش فايدة فىك .. طيب أنا هاأبعثك رحلة (على جناح التبريزى وتابعه قفة) .
- لا والنبي بلاش (قفة) أنا بخاف أركب (الهيلو قفة) .
- (هيلو قفة) إيه ؟! أنت ها تعمل عبيط ؟
- (الهيلو قفة) يعنى (الهليكوبتر) أنت ما سمعتش (الإفيه) ده قبل كده فى مسرحياتى يا دُغْف .
- لا والله ما سمعتش عن (الهيلو قفة) .. أصل أنا زى الأطرش فى الزفة .. وبالمناسبة يا بكر مين (قفة) ده ؟
- قفة ده يا سيدى عامل كده زى (سنقر الكلبى) فى مسلسل (على الزيتق) والمعنى لامؤاخذه فى بطن القارئ قصدى فى بطن

الشاعر حتى اسأل أى (عصفور فى القفص) يقول لك .

■ يا سلام عليك .. (إنك لمتمكن) تعرف إنى (عبيتك عبيتك) قصدى (حبيتك) من أول نظرة .. (أنت بابا وأنت ماما وأنت أنور وجدى) وأنت محلب .

- كفاية (عب) بقى أحسن (أعبيك) فى شوال وتعالى (شيلنى واشيلك) وقل لى ما الفرق (بين الديك الرومى والفراخ الفيومى) ؟
■ زى الفرق بين (الكفتة والكوستليته) ؟ تحب ندق :ـ ماغك ونعملك كفتة زى المواطن محدود الدخل وللا نهرسك ونعمل كوستليته زى المواطن معدوم الدخل .

- (مش عاوز كوستليته خلىنى كفتة أحسن) بس أمانة عليك هات لى بدلة علشان أقابل سهير البابلى فى النقابة .

■ عاوز تقابل سهير البابلى فى النقابة ببدة ليه ؟

- أصل (الدخول بالملابس الرسمية) وأنت عارف سهير حنبلية وما عندها مش تفاهم وبتخاف من (كلاب الحراسة) وعلشان كده (الاحتياط واجب) لأنها لو زعت مش هاتركبنى (الهيلو قفة) .

■ أنت هاترجع تهجّص تانى وتقول لى (الهيلو قفة) ؟؟

- بقول لك إيه ما تدقش على كلامى وفوّت (الهيلو قفة) .. أصل أنا عندى (هفه) .

فريد تنوقي
وحش الشاشة الفتوة الطريف



1920-1998



أشهر أعماله :

- جعلوني مجرمًا
- عترة بن شداد
- الظلم حرام
- بداية ونهاية
- الدلوعة
- قهوة المواردى
- بورسعيد
- رصيف نمرة (٥)
- خطف مراتى
- شارع محمد على
- صابر يا عم صابر
- البكاشين
- الفتوة
- يارب ولد
- أمير الدهاء
- عثمان الجبار
- شايش نص الليل
- ٣٠ يوم فى السجن
- إعدام ميت
- باب الحديد

أشهر إفيهاته :

- وشرف أمى
- زى الى قبلها والى قبل قبلها
- والا زمان زمان وللا
- يا منجى الوحش من الجعش

- ياعدوى
- أشهر القابه :
- وحش الشاشة
- ملك الترسو
- زوربا المصرى
- أبو البنات



ألو... مين معايا؟



▪ صباح الفل يا (وحش الشاشة) يا (ملك الترسو) يا (زوربا المصري) .. يا ..

- (وشرف أمي) باين عليك أونطجي ومهياص .. بقول لك إيه سييك من الألقاب دي كلها وقل لي يا (أبو البنات) أحسن .

▪ بقى معقولة تتنازل عن الألقاب دي كلها وعايزني أقول لك يا أبو البنات بس ؟!

- معلوم يا حضرة (المدير الفني) .. أصل أبو البنات هو أغلى لقب عندي (وشرف أمي) .

▪ ماشي يا عم فريد شوقي يا أبو البنات بس تقدر تقول لي لماذا جعلوك مجرماً ؟!

- (جعلوني مجرماً) بسبب الظلم وأنت عارف إن الظلم حرام) وعلشان كده خرجت وأنا طالب في مظاهرات ضد الإنجليز

- سنة ١٩٣٥ أصل أنا من عائلة وطنية وبموت في الوطنية .
- أنا سمعت إن والدك كان خطيب ووطني شهير في حي السيدة.
 - أمال يا حضرة .. أنا والدي كان وفدى قديم وسعد باشا زغلول أطلق عليه (بلبل السيدة زينب) .
 - طيب لما أنت كده إيه الى خلاك شخصيخة في إيد (الدلوعة) نيللى ؟!
 - أنا عمري ما كنت شخصيخة (وشرف امي) بدليل إن الرئيس جمال عبد الناصر كان معجب بفنى وكلفنى أعمل فيلم عن (بور سعيد) أيام الاعتداء الثلاثي سنة ١٩٥٦ .
 - سيك من الوطنية وقل لي أقوالك إيه في المحضر الى عمله ضدك أنور وجدي وقال للضابط امسكوه ده (خطف مراتي) ؟
 - أنا خطفت مراته وللا هو الى ضحك عليها واتجوزها وأخذ فلوسها وبعدين رماها (زى الى قبلها والى قبل قبلها) وفضلت (صابر يا عم صابر) لحد ما فرقعت .
 - وتفرقع ليه ؟ وأنت مالك ؟ ما تخليك في حالك وتسبب الى يخطف يخطف والى ينهب ينهب أنت هاتعدل حال الدنيا ؟
 - أيوه هاعدلها .. ده أنا (الفتوة) وأنا (أمير الدهاء) وأنا (عترة بن شداد) .

▪ ونسيت إنك كنت البلطجي (حسن أبو الروس) في فيلم (بداية ونهاية) وبتغنى في الأفراح ؟

- لا مانسيتش (وشرف أمى) ده أنا حتى نفسى أغنى تانى (واللا زمان زمان واللا) بقول لك إيه ما تيجى لى فى (قهوة المواردى) وتجيب معاك (هدى سلطان) ونغنى سوا .

▪ إيه رأيك أجيب معايا كمان (هند رستم) وأخوها (زكى رستم) ؟

- زكى رستم يبقى أخو هند رستم ؟ حلوه دى .. طيب قابلى بقى على رصيف نمرة (٥) .

▪ بلاش رصيف نمرة (٥) أصى البياعين المتجولين مسيطرين عليه .. ما تيجى نتقابل فى (شارع محمد على) أحسن وتبقى فرصة نلّم (البكاشين) ونغنى (يا رب ولد) .

- أنت بتتريق عليّا ؟ طيب (وشرف أمى) لأخلى (عثمان الجبار) يسلمك (لشاويش نص الليل) .

▪ والله لو حد قرب ناحيتى لأذعى عليه وأقول (يا مُنْجى الوحش من الجحش) .

- أنت بتسرق الدعوة بتاعنى يا حرامى .. طيب والله لأجيب لك (الفسافيس) .

- قصدك مين الفسافيس ؟ آه افكرت مش دول (ثلاثى أضواء المسرح) فى فيلم (٣٠ يوم فى السجن) .
- برافو عليك أنت مذاكر كويس .. لكن يا ترى هاتفك نفسك ازاي لما يكتفوك بالجنازير ؟؟
- بسيطة هعمل زيك وأقول (يا عدوى) ألاقى الجنازير اتفكت والستارة تنزل و (يوسف بك وهبى) يسقف لى .
- مالکش دعوه بيوسف بك وهبى ده أستاذى ومثلئ الأعلى وعن إذنك بقى ورايا مشوار .
- سيبك من المشوار وتعال معايا نتفرج على (إعدام ميت) قصدى إعدام موظف فى (باب الحديد) وبالمرة نشترك فى إضراب الموظفين ضد (الفتوة) اللى كل يوم يغلى الأسعار وماحدث مالى عينه .
- ولا إضراب ولا يحزنون أنتم بس تدعوا وتقولوا (يا منجى الوحش من الجحش) وبعدها يتفك النحس .

محمد كمال المصري

شرفنطح المكار المنافس الفاشل لكشكش بيه



1886-1961



أشهر أعماله :

- أبو حلموس
- عيني بترف
- عفريته إسماعيل يس
- سي عمر
- بيت التتاش
- الأنسة ماما
- كله إلا كده
- حسن ومرقص وكوهين
- فاطمة

أشهر إفيهاته :

- معلوم يا حضرة
- خيبة الله عليك
- باشكاتب يلعب على باشكاتب
- هو أنا وش ذلك
- إلا إذا
- النص ريال بتاعى



آلو... مين معايا؟



▪ آلووه يا (شرفنطح) افندى .

- شرفنطح مين يا أفندى ؟؟ أنت بتمهزق .. النمرة غلط .

▪ غلط إزاي ؟ أنا شايفك على (الاسكايب) فى الموبايل بطربوشك وشنباتك .

- يا أفندى أنا محمد كمال المصرى المولود فى حارة ألمظ شارع محمد على وشرفنطح إسم الدلع أو إسم الشهرة .

▪ ما أنا عارف بس ليه تنكر نفسك وتقول النمرة غلط ؟!

- أصل الواد (حسن فايق) بيستخفّ دمه وكل شوية يطلببنى ويقول (شرفنطح عاوز ينطح) .

▪ وبالمناسبة مش أنت ابتكرت اسم (شرفنطح) علشان تنافس (كشكش بيه) ؟

- (معلوم يا حضرة) .. بس للأسف سقطت في المنافسة بس سقطت بشرف لأن كشكش بيه الملعون كسبنى بالعوالم والرقاصات اللى جذبوا الجمهور لفرقة (كح كح كح).

▪ مالك بتكح ليه ؟ سلامتك ألف سلامة .

▪ لا مؤاخذه يا ابني (الربو) بيدلنى كح كح كح . وقلت لجارى الباشكاتب (خيبة الله عليه) يجيب لى العلاج خد الفلوس وهرب .. عمرك شفت (باشكاتب يلعب على باشكاتب) .

▪ عادى ما كله بيلاعب على كله .. بس أنا سمعت إن الست (مارى منيب) عندها وصفة حلوة لعلاج الربو .

- (قطيعة تقطعها) دى كانت ها تجيب أجلى واللى غايظنى إنها عايزة كل ما تقوللى وصفه تلهف منى أهيف يعنى (جنيه بوشه) .

▪ بوشه ولا بضهره المهم صحتك ولا أنت بخيل فى الحقيقة زى ما أنت بخيل فى التمثيل ؟

- أنا بخيل ؟! عيب يا حضرة .. (هو أنا وش ذلك) .. بس المسألة إن (عينى بترف) .

▪ بترف ليه ؟ هى (عفرينة إسماعيل يس) عملت لك روشة (وقلعتك هدومك) وللا إيه ؟

- لا مش المقصود كده بس (المعلم ساطور والواد كوارع) بتوع (سى عمر) عملوا (كوبانية) على محسوبك وحبسوني فى (بيت التناش) وسلموا دقنى (للآنسة ماما) .

▪ سلموا دقنك للآنسة ماما ؟ لا (كله إلا كده) وأنا الى كنت عاوزك تحلق لى دقنى ؟!

- وأنا مش ها احلق لك دقنك (إلا إذا) .

▪ (إلا إذا إيه) يا عم شرفنطح ؟

- إلا إذا رجعت لى (النص ريال بتاعى) الى اشتريت بيه ورقة (اللوتريا) من شحاتة أفندى .

▪ قصدك نجيب الريحانى فى فيلم (أبو حلموس) ؟ مش كده يا (عكاشة يا صاحب صالون دقن الباشا) .

- كده يا اخويا .. وعلى فكرة أنا إتراهنت مع (حسن ومرقص وكوهين) إنى أحلق دقنى لو فلحت .

▪ طيب إيه رأيك ها فلع بالعند فيك وها اجيب لك (واحد هندى) يقرأ لك الطالع ويقول لك (سيخ سيخ) ويحط السيخ المحمى فى صرصور ودنك .

- سيخ مين يا أفندى يا هُزق .. ده أنا (شملول ومراتى ضريبة

هانم) على سن ورمح يعنى ها أسود عيشتك .

▪ أنت بتهددنى يا (شر) من غير (فنتطح) .. طيب والله لانتف لك دقنك .. (إلا إذا) .

- إلا إذا إيه ؟ أنا فى عرضك .

▪ إلا إذا غنيت معايا أغنية أم كلثوم (نصره قوية وألف سلامه) علشان الست فاطمة ربنا ينصرها على أعاديها .

- ماشى هاغنى معاك بس تبلغ الحبايب والأحفاد نصيحتى لهم وهى قول الشاعر:

ومن لم يكن لى والزمان شرم بُرم .. فلا خيرَ فيه والزمانُ ترللى !!

جدو يوسف وهبي

من بيومي أفندي إلى شنبو في المصيدة



1898-1982



أشهر أعماله :

- شنبو في المصيدة
- كرسى الاعتراف
- إشاعة حب
- الأفوكاتو مديحة
- اعترافات زوج
- ليلة ممطرة
- بيومي أفندى
- غرام وانتقام
- سفير جهنم
- الكونت دى مونت خريستو
- سيف الجلاد
- أولاد الذوات
- راسبوتين
- أولاد الفقراء
- أولاد الشوارع

أشهر إفيهااته :

- اغرب عن وجهي
- عليك اللعنة
- يا للمهزلة
- يا وحيد عصرك
- يا للهول
- ممنون
- إنما الدنيا مسرح كبير
- أלא هلاً على الجد
- شرف البنت زى عود الكبريت



ألو... مين معايا؟



- ممكن أكلم حضرة صاحب العزة يوسف بك وهبي .
- من أنت ؟ قل من أنت أو (اغرب عن وجهي عليك اللعنة) .
- أنا (شنبو في المصيدة) شنبو يا شنبو والله احلويت يا شنبو .
- (يا للمهزلة) الشنبية .. (عليك لعنة) شنبو يا شنبو .
- (يا للمهزلة وعليك اللعنة) .. يبقى أنت أكيد يوسف بيه وهبي مش كده ؟
- أيوه أنا يوسف بك وهبي عميد المسرح العربي .. أنا بن عبد الله باشا وهبي أنا مؤسس مسرح رمسيس أنا رسول العناية الإلهية للنهوض بالفنون المسرحية .
- وأنا محسوبك فرفوش بن قطموش مندوب أخبار اليوم في العالم الآخر وعاوز أهدي لجنايبك تحيات وسلامات الست أمينة رزق وزينب صدقي وفاطمة رشدي وأحمد علام .

- باين عليك غلباوى وهجاص وهلاس وخلبوص ومقروص .. عاوز إيه (يا وحيد عصرك) ؟
- عاوزك تقعد على (كرسى الاعتراف) وتقول لى ليه فضلت الدراما مع إنك تمتلك موهبة كوميدية خطيرة ؟!
- (يا للهول) .. أنا ممثل كوميدى مسخرة أرقص وأغنى زى كشكش بيه وأقوم بتلعيب حواجبى زى على الكسار .. هذا لا يكون لا يكون (عليك لعنة كشكش بيه) .
- طيب ما أنت مثلت كوميدى فى فيلم (إشاعة حب) وفيلم (اعترافات زوج وشنبو فى المصيدة) .
- دى كانت كده أدوار على سبيل التهريج لكن لو عاوز تشوفنى بصحيح اتفرج على (بيومى أفندى وسفير جهنم وسيف الجلاد) .
- طيب لو رجعت الدنيا دلوقت تحب تمثل إيه ؟ وليه ؟
- أحب أمثل (راسبوتين) علشان أقضى على الفوضى وأعلمكم الأدب أيها الغوغاء .
- بلاش راسبوتين يا يوسف بيه لأنك متهم بالتحريض على العنف والبلطجة والشعوذة .
- أنا متهم ؟! (يا للهول .. يا للمهزلة) .. طيب تسمح لى أجيب المحامى بتاعى (الأفوكاتو مديحة) .

▪ لا الأفوكاتو مديحة ولا (١٠٠) أفوكاتو هايفيدوك في حاجة .. أنت ليلتك سودة (وليلة ممطرة) في سجن طره ونهايتك (غرام وانتقام) قصدى انتقام بدون غرام.

- (ممنون) .. وحيث كده بقى (أللا هلا على الجد .. والجد أللا هلا عليه) وأحب أقول لك يا قطموش أفندى إنى لا يهمنى انتقامكم ولا انتقام (الكونت دى مونت خريستو) .

▪ مين (منفستو) قصدى (خريستو) ده ؟ وعاوز تقول إيه ؟

- عاوز أقول (إنما الدنيا مسرح كبير) وأنا في بداية حياتي اتعلمت المصارعة قبل ما اشتغل مشخصاتي (ممثل) واللى بيحصل دلوقت ده ولا يهز شعرة في شنى .

▪ هانرجع تانى لشنبك وشنبى وشنبو في المصيدة ؟!

- اخرس عليك اللعنة واقرأ كتابى (عشت ألف عام) وبعدين ابقى تعال كلمنى .

▪ قرأته والله يا يوسف بيه وعرفت إنك عشت في عصر الخديو عباس الثانى والسلطان حسين كامل والملك فؤاد وأخذت البكوية من الملك فاروق وتم تكريمك من عبد الناصر والسادات .

- (ممنون) .. برافو عليك .. أنا كمان عشت مع (أولاد لذوات وأولاد الفقراء وأولاد الشوارع) ولكن ما شفتش أولاد (....) زيكم

.. حتى شرف البنت الى كان (زى عود الكبريت ما يولعش إلا مرة واحدة) بقى فى زمانكم زى (الولاعة) يتولع زى ما أنت عايز !!

▪ باين عليك عاوز تُعك فى الكلام .. عن إذنك علشان ألحق طابور الفرن واصرف كوبونات العيش .

- طابور فرن وكوبونات عيش !! أمال فىن الزراعة والقمح والفلاح (عليكم لعنة الفلاح) .

▪ الفلاح (تعيش أنت) خلاص نام وارتاح .. وانتهى زمنه وراح .. باى باى يا جدو .

ميمي تنكيب

ملكة الخفة والشقاوة والدلع



1913-1983



أشهر أعمالها :

- الدلوعة
- ابن الشعب
- تحيا الستات
- حياة الظلام
- سى عمر
- بنت ذوات
- دعاء الكروان
- كذب فى كذب
- البحث عن فضيحة
- حكم قراقوش
- الحموات الفاتنات
- لو كنت حليوة

أشهر إفيهااتها :

- يوووه
- يا مدهول على عينك
- اتنيل واسكت
- إخيه عليك
- يا مشمش
- يا روح ماما
- يا ننوس عيني



ألو... مين معايا؟



- صباح شريف ميمى هانم .. صباح الخفة والشقاوة والدلع .
- (يوووو) .. عاوز إيه (يا مدهول على عينك) !!
- عاوز (نظرة رضا) .. عوز (راندفو) أقابل فيه (الدلوعة) .
- (اتنيل واسكت) .. أنت مين أنت علشان تقابل الدلوعة وأنا
- الى كان أحمد حسنين باشا رئيس الديوان الملكى وعبود باشا رجل الأعمال وكل باشوات مصر بيدبوا فى دباديى وكعب جزمى .
- باشوات إيه يا روحى ؟ ما خلاص راح زمن الباشوات !!
- فشر يا عمر .. أنتم زمانكم برضه فيه باشوات بس (فالصو)
- لكن زماننا كان فيه باشوات حاجة تانيه باشوات بحق وحقيقى
- باشوات أولاد ناس مش باشوات فساد وغسيل أموال (إخيه عليهم)
- دول مش باشوات دول قفوات .
- أنت مفيش فايذة فيكى برضه لسانك طويل وعاوزه تودينى

في داهية !!

- أنا لسانى طويل يا نص راجل يا راجل شبر ونص والله لأجيب لك جوزى سراج منير يعشيك ويغديك يعنى يدك علقه محترمة ويكسر لك دماغك .

▪ معلش يا ستى حقك علياً و (تحيا الستات) .. أنا عندي لك رسالة من (سى عمر) .

- بتقول إيه (يا مشمش) ؟ رسالة من سى عمر ؟ طيب ابعتهالى على الفيس بوك .

▪ انت مقطوع علشان الكهرباء مقطوعة والرسالة بسيطة مش محتاجة فيس بوك .

- طيب (يا روح ماما) بس تسمح الأول (تولع لى السيجارة) .

▪ أنا أولع لك ؟! أنت مش عارفة إن التدخين ضار جداً بالصحة يا (زنوبة) .

- زنوبة مين يا مشمش ؟!

▪ (زنوبة المخدماتية) فى فيلم (دعاء الكروان) أنت نسييتينى ؟ أنا المهندس أحمد مظهر .. يووه خلّيتنى أنسى رسالة سى عمر .

- بقول لك إيه أنا صحيح أرسنقراطية و (هاى لايف) بس شركسية وغازية وعالمة وينت بلد وحاسه كده إنك غاوى (البحث

عن فضيحة) !!

■ يا ست ميمى لا فضيحة ولا حاجة الحكاية وما فيها إن
(الريحانى) لقي الكلبة بتاعتك المنقطة أبيض فى أسود .. لقاها فى
ميدان التحرير بس للأسف لقاها من غير ذيل .

- من غير ذيل إزاي ؟ يبقى أنت اللى سرقت ذيلها وقعتك زى
وشك (يا مشمش).

■ يا ست ميمى حرام عليكى .. مشمش إيه ؟ وأنتِ خلّيتنى
أحمرّ وأصفرّ لغاية ما دمتى نشف .

- أنت لسه شفت حاجة أنا ها اوريك (حكم قرقوش) .. أنت
يظهر ما تعرفينش كويس ؟!

■ لا أعرفك كويس وأعرف إن والدك كان (مأمور قسم
حلوان) وجدك كان ضابط كبير فى جيش الخديو إسماعيل وأنتِ
زعيمة حزب (الحموات الفاتنات) .

- برافو عليك (يا ننوس عيني) .. بس (لو كنت حليوة) كنت
اتجوزتك .

■ تتجوزينى إزاي وأنا (ابن الشعب) وعشت (حياة الظلام)
وأنتِ (بنت ذوات) .

- ما تأخذش فى بالك أهو كلام (كذب فى كذب) تسمح تولع لى

بقى ؟

- تانى عاوزانى أولع لك .. لأ أنا ها أولع فى نفسى بس بعد ما أرفتك من (جماعة أنصار التمثيل والسينما) ؟
- أنت ترفتنى يا سى المهندس (المهندس) ده أنا زنوبة والأجر على الله .. يا ويلك .
- طيب حقتك علياً وهاتى دماغك وإيدك ورجلك أبوسهم .
- كل ده عاوز تبوسه ؟ باين عليك عاوز تتحرش بيا .. إلحقنى يا وزير الداخلية.



صدر للمؤلف

ياسر قطامش

دواوين شعرية :

- نقوش على شفتين صدر عام ١٩٨٥ طبعة خاصة.
- قدمت للحب استقالة صدر عام ١٩٩٠ عن الهيئة العامة للكتاب.
- لولاي ما كنت أنثى صدر عام ١٩٩٢ عن دار النديم.
- صائدة القلوب صدر عام ١٩٩٥ عن مكتبة الآداب.
- القلب في ورطة بين ليلي وبطة صدر عام ١٩٩٩ عن الدار المصرية اللبنانية.
- مشاغبات شعرية صدر عام ٢٠٠٥ عن الدار المصرية اللبنانية.
- مخلوع مخلوع يا ولدي صدر عام ٢٠٠٩ عن دار الفاروق.
- عروس البحر صدر عام ٢٠١٠ عن دار الفاروق.
- امرأة في مقهى القلب صدر عام ٢٠١٠ عن اتحاد كتاب مصر.
- فذلكة شعرية بالفصحى والعامية صدر عام ٢٠١١ عن الدار

المصرية اللبنانية.

- عجائب الأشعار في الجد والهزار صدر عام ٢٠١١ عن مكتبة جزيرة الورد.

- كارت شحن عاطفي صدر عام ٢٠١٤ عن الهيئة العامة للكتاب.

- أشعار عامية .. بالشطة والتقليد صدر عام ٢٠١٥ عن دار الفيروز.

مقامات ومنوعات أدبية ساخرة :

- الهوامش لابن قطامش صدر عام ١٩٩٨ عن الدار المصرية اللبنانية.

- مذكرات ثائر ساخر صدر عام ٢٠١١ عن قطاع الثقافة بأخبار اليوم.

- يوميات موكوس بن ملحوس صدر عام ٢٠١٣ عن قطاع الثقافة بأخبار اليوم.

- خمسة هلفطة عن الأحوان المملخبطة صدر عام ٢٠١٤ عن دار نهضة مصر.

قصص ومقالات وصور قلمية :

- حواديت الكتاكيت والعفاريت صدر عام ٢٠٠٢ عن الدار المصرية اللبنانية.

- أنا جوزي مفيش منه صدر عام ٢٠١٣ عن دار نهضة مصر.

صور تاريخية برؤية مرحة :

- حكاوي الولد الغلباوي صدر عام ٢٠٠٧ عن الدار المصرية اللبنانية.
- فنجان قهوه مع أفندينا صدر عام ٢٠١٠ عن الهيئة العامة لقصور الثقافة.
- عشرة طاولة مع الملك فاروق صدر عام ٢٠١١ عن كتاب أخبار اليوم.
- وحوى يا وحوى صدر عام ٢٠١١ عن الدار المصرية اللبنانية.
- ساعة لقلبك مع عبد الناصر صدر عام ٢٠١٣ عن مكتبة جزيرة الورد.
- أخبار الفنانين... في القرن العشرين صدر عام ٢٠١٦ عن مكتبة الآداب.

دراسات تاريخية :

- مصر .. صور لها تاريخ صدر عام ٢٠١١ عن الدار المصرية اللبنانية.
- مصر في عيون فرنسية صدر عام ٢٠١٤ عن هيئة قصور الثقافة.
- مصر في ذاكرة الصحافة صدر عام ٢٠١٤ (وزارة الآثار بالتعاون مع مركز يونس إمرة الثقافي).

دراسات أدبية

- المختار من أشعار عامر بحيرى صدر عام ٢٠١٠ (الهيئة العامة للكتاب).
- أبو نواس الجديد (حسين شفيق المصرى) صدر عام ٢٠١١ (هيئة قصور الثقافة).

أعمال تحت الطبع

- مين يشتري الحب منى ؟ (ديوان شعر).
- منمنمات قطاميشي .. بالفصحى والحلمنتيشي (ديوان شعر)

أعمال جارى الإعداد لها :

- لطائف من قديم الصحائف .
- تسالى وحكايات .. عن عجائب المخلوقات .
- المرغوب فى الترويح عن القلوب .
- لامؤاخذه أنا مستعجل .
- الكاريكاتير أيام زمان .
- الإعلانات أيام زمان .
- مكسرات .
- دعوة للفرشة .
- رائحة الأحباب .

الفهرس

- إهداء ٣
- مقدمة (اللهم اجعل كلامي خفيفاً عليهم) ٤
- ١- حضرة صاحب العزة سليمان بك نجيب : جتئلماان السينا
المصرية ١١
- ٢- أبو لمعة الأصلى : زعيم مملكة الفشر ١٧
- ٣- زينات صدقى : الخدامة العانس بنت البلد ٢٣
- ٤- شكوكو : الأراجوز بتاع المونولجات ٣١
- ٥- مارى منيب : زعيمة حزب الحموات الفاتنات ٣٧
- ٦- عبد الفتاح القصرى : المعلم ابن البلد المجدع والحنوتى عند
اللزوم ٤٥
- ٧- الدكتور شديد : نجم ساعة لقلبك ٥٣

- ٦٠ - كلايت تانى مرة : مع الدكتور شديد
- ٦٥ ٨- الخواجة بيجو : رفيق أبو لمعة فى مملكة الفشر
- ٧١ ... ٩- عبد السلام النابلسى : الشهير بحسب الله السادس عشر
- ٧٩ ١٠- عبد المنعم إبراهيم : فتايت السكر
- ٨٧ ١١- أمين الهنيدى : الشيخ علام .. بتاع الأحلام
- ٩٥ ١٢- حسن فايق : أبو ضحكة ماركة مسجلة
- ١٠١..... ١٣- على الكسار : بربرى مصر الوحيد
- ١٠٩..... ١٤- الضيف أحمد : نجم ثلاثى أضواء المسرح
- ١١٥..... ١٥- عبد المنعم مدبولى : بابا عبده رائد المدبوليزم
- ١٢٣..... ١٦- محمد عبد المطلب : شيخ مشايخ الطرب الشعبى
- ١٣١..... ١٧- سيد الملاح : المونولجست ملك السمسمة
- ١٣٧ ١٨- سيد مكاوى : الضيرير البصير مسحراتى مصر المحروسة

- ١٩- فؤاد المهندس : مستر إكس أخطر رجل في العالم ١٤٣
- ٢٠- أم كلثوم : كوكب الشرق العظيمة على عظمة على عظمة ١٥١.
- ٢١- محمد رضا : ابن البلد الشهير بالمعلم رضا بوند ١٥٩
- ٢٢- جمالات زايد : العانس الرغبة الخاطبة والزوجة النكدية ١٦٧
- ٢٣- توفيق الدقن : الشرير البلطجي الحرامى المرح ١٧٣
- ٢٤- أحمد الحداد: الشهير بأدوار الصعيدي والعراقة والرغبة. ١٧٩
- ٢٥- بشارة واكيم : أشهر من قام بأدوار الشخصية الشامية ١٨٥
- ٢٦- نجوى سالم : دلوعة فرقة نجيب الريحانى ١٩١
- ٢٧- إستيفان روستى : الشرير النذل الانتهازى الظريف ١٩٩
- ٢٨- أبو بكر عزت : مفتش عام الكوميديا والمرح ٢٠٥
- ٢٩- فريد شوقي : وحش الشاشة الفتوة الظريف ٢١١
- ٣٠- محمد كمال المصرى: شرفنطح المكار المنافس الفاشل
لكشكش بيه ٢١٩
-

٣١- جدو يوسف وهبي: من ييومى أفندى إلى شنبو فى المصيدة ٢٢٥

٣٢- ميمى شكيب : ملكة الخفة والشقاوة والدلع ٢٣٣

صدر للمؤلف ٢٤١

الفهرس ٢٤٥

